

Isipla wei long promotim bisnis bilong yu

**GUTPELA KWALITI, GUTPELA PRAIS LONG PNG**

**Bisnis Kads** | **K120** | **K175**

200 kads + takis  
 Printin tasol  
 Wanpla sait, ful kala 300 gsm pepa.


200 kads + takis  
 wantaim disain wok

Only at...  
**THEODIST LTD**  
 THE STATIONERY SUPERMARKET  
 Waigani Drive, PCM Markham Road, LAE  
 Php: 313 9900 / 7232 1300 Php: 472 5488 / 7091 7854  
 sales@theodist.com.pg sales@theodist.com.pg

KOLIM MIPLA NAO!

**The Catholic Reporter**

**Insait: P9,10,19,20**



# Klaimet senis sotim kaikai



**GOL, KOPA, OIL NA GAS bai pinis, KALSA bai stap yet**

Grup bilong Hela i kam raun long Mosbi siti long nambawan taim long seremoni bilong lonsim long Star Maunten plaza projek. Ol i kam raun long Visen Siti na amamas long soim tumbuna bilas bilong ol long soim ol yangpela olsem pasin tumbuna em bikpela samting. Ol i tok, gol, kopa, oil na ges bai pinis, tasol kalsa bai stap yet.

Poto: Iona Sharon Reto-MRDC

**Aja Potabe i raitim**

**SEKYURITI** bilong ol kaikai insait long Pasifik rijon bai no inap stap gut sapos ol lida bilong yumi i no sanap wantaim na pait egensim birua bilong global woming na klaimet senis.

Praim Minista Peter O'Neill i mekim dispela toktok asde nait long opim namba 46 bung bilong Pasifik Ailan Forum (PIF) long Taurama Akwatik Senta, Pot Mosbi.

PM O'Neill, husat bai kamap nupela siaman bilong PIF neks yia, i tokim ol lida bilong 16 Pasifik Ailan kantri long 'sanap wantaim na sanap strong' long stretim laip bilong ol pipel bikos gobal woming na klaimet senis bai kamap wanpela bikpela birua.

"Sekyuriti bilong kaikai em i bikpela samting long laip bilong manmeri olgeta de.

Global woming na klaimet senis bai sotim ol kaikai bilong yumi. Yumi mas sanap wantaim, wokbung wantaim na pait egensim klaimet senis," Mista O'Neill i tok.

Em i tok tude planti manmeri PNG i kisim taim bikos ples i drai, no gat ren i kam, na bikpela ais i bagarapim gaden kaikai long hailans.

"Long hia (PNG) ol manmeri i kisim taim. Na dispela em i sain o mak bilong global woming na klaimet senis. Saiklon Pam long Vanuatu i bagarapim sindaun na laip bilong ol manmeri long hap tu," em i tok.

Mista O'Neill i tok ol liklik Pasifik Ailan kantri i no save kamautim ol grinhaus ges (GHG). Tasol ol liklik ailan kantri i wok long kisim bikpela bagarap.

*I go moa long pes 2...*

# JETAWAY TO CAIRNS

SAVE 20 MINUTES IN TRAVEL TIME!



- SPACIOUS CABIN
- FULL SERVICE MEALS
- DUTY FREE OPTIONS

Call Toll Free on 180 3444 or contact your nearest Air Niugini Travel Centre or Travel Agent for more information.

**Air Niugini**  
 www.airniugini.com.pg





# Yu kukim kaving em yu brukim lo

## Aja Potabe i raitim

**NESENEL Kalsarel Komisarin (NCC) i no wanbel long wanpela niuspepa edvetaismen o pablik notis i bin kamaut long det Ogas 24 long wanpela niuspepa.**

NCC eksekutiv dairekta Dokta Jacob Simet i tok manmeri o ogenesen husat i putim dispela niuspepa edvetaismen i brukim Mama Lo bilong dispela kantri.

Man o meri o ogenesen husat i putim dispela niuspepa edvetaismen i no bin putim nem. Tasol dispela pablik notis i tok long kukim ol kaving we Palamen Spika Theo Zurenuoc i bin rausim i kam daun long Palamen Haus.

“Nogat wanpela man i putim nem bilong en long niuspepa. Tasol dispela toktok long kukim ol kaving na samting bilong tumbuna em i egensim Mama Lo bilong PNG,” Dokta Simet i tok.

Em i tok NCC i no wanbel long dispela toktok bikos:



Kavin bilong ol Wara Sepik.

Dispela kain toktok long kukim ol kaving na tumbuna samting em i egensim Mama Lo bilong PNG

na ol arapela intanesenel protokol;

Dispela toktok long niuspepa em i egensim Seksen 45 bilong Mama Lo bilong PNG we lo I givim tok orait long ol manmeri long yusim fridom long mekim ol tumbuna samting;na

Dispela toktok long niuspepa bai bagarapim pasin tumbuna na kalsa bilong ol manmeri.

Dokta Simet i tok lo i givim tok orait long NCC, Nesenel Misium na At Geleri na ol provinsal gavman long noken larim ol manmeri i bagarapim ol samting bilong kalsa, kastom na tumbuna.

“Aninit long Ogenik Lo bilong Provinsal na Lokol Level Gavman, Nesenel Kalsarel Propeti na Prisevesen Ekt seksen 42 na 44 i tok tambu long manmeri long kukim, brukim na yusim nating dispela kain ol kaving na samting bilong tum-

buna,” Dokta Simet i tok.

Em i tok i gat ol lo bilong wan wan kalsa bilong PNG i stap. Sapos wanpela manmeri o grup i bagarapim kalsa bilong narapela manmeri o grup, dispela bai kamapim hevi na birua.

Wantok Niuspepa i bin askim opis bilong Palamen Spika Theo Zurenuoc long sekim sapos dispela niuspepa edvetaismen o pablik notis i kam long en.

Tasol Palamenteri Sevises Konsalten John Varey i tok Spika i no bin putim aut dispela pablik notis.

Varey i bin mekim dispela toktok las wik Mande taim Trensparensi Intanesenel PNG (TIPNG) i bin holim wanpela woksop long ‘Open Palamen Projek’.

Varey i tok Spika Zurenuoc i rausim pinis ol kaving na ol arapela samting bilong tumbuna we i bin stap long Palamen Haus.

“Tasol mipela i no bin kukim wanpela samting. Mipela i no save long dispela pablik notis tu. Em i no kam long opis bilong Palamen Spika,” Varey i tok.



T.H.E Pati lida Don Polye

## T.H.E Pati sanapim nius ripota long ijivitari bai-ileksen

### Stanley Nondol i raitim

**NAMBA Tu bikpela politikl pati, T.H.E Pati i sanapim wanpela nius ripota long ijivitari bai ileksen long Oro Provins.**

T.H.E Pati lida Don Polye, memba bilong Porgera Nixon Mangape, Memba bilong Kikori Mark Maipakai i go kamap long ijivitari long dispela wik na endosim Simon Erero olsem ofisal kendidet bilong T.H.E Pati long salens bilong bai ileksen.

Mista Erero em i bin wanpela sinia nius ripota long Post Courier na bihain long en em i bin wok long palamen haus.

Lida, Don Polye wantaim oposisen memba bilong palamen i tokim ol pipel long ijivitari olsem ol i mas glasim gut ol kendidet husat i ken tingting long ol na givim sevis wantaim ol mani gavman i givim long nem bilong distrik .

Ol i tokim ol pipel long noken sapotim ol kendidet i gat nem nogut long pasin korapsen bikos korapsen i wok long kilim fai kantri na bihain jenere-sen.

Ol i tokim ol pipel moa olsem taim oposisen i kisim gavman bai ol mekim save long ol sampela lida husta i kamap memba na kamap bikpela miliena long korap pasin long nem bilong developmen na pipel.

T.H.E Pati i tok em bai no inap sapotim ol kendidet i gat nem nogut long pasin korapsen bikos pati i pait agensim sampela bikpela korapsen insait long kantri.

Ijivitari bai ileksen i kamap bihain long Nesenel Kot i rausim David Arore long kot i painim asua long sampela paul pasin bilong braiberi long taim bilong vot long 2012 nesenel ileksen.

Mista Arore i bin win long tiket bilong T.H.E Pati long 2012 ileksen na bin kamap Haia edukesen minista long gavman.

Mista Arore nau i sanap long Peoples National Congress Party bilong Praim Minista Peter O’Neill long winim bek sia em i bin win im long 2012.

# Solwara wok long daunim Kiribati

## Aja Potabe i raitim

**PRESIDEN** bilong Kiribati, Anote Tong i tok mak bilong solwara i wok long go antap na i laik karamapim ol liklik ailan.

Presiden Tong i tok solwara i wok long isi isi daunim nambis bilong kantri Kiribati na bihain long sampela yia ol manmeri bai no moa stap bikos wara bai karamapim graun na ol samting.

Mista Tong i tokaut olsem dispela em i han mak bilong klaimet senis insait long Pasifik Ailan.

Em i tokim dispela toktok long ol nius manmeri long Tunde long Pot Mosbi we Mista Tong i kam long bung bilong 46 Pasifik Ailan forum bung.

“Mi save i no kantri bilong mi tasol. Ol narapela liklik ailan kantri tu i wok long kisim taim. Mi sori long ol pipel bikos mipela bai lusim bus, graun na wara taim solwara i karamapim ailan kantri bilong mipela,” Tong i tok.



Presiden Tong i holim lewa bilong en taim em i tingim bek long liklik ailan kantri bilong en Kiribati.

Em i tok ol pipel bai lusim kalsa, graun na pasin tumbuna bilong ol bikos ol bai lusim ples bilong ol yet na go stap long

narapela hap olsem ol refuji. “Mi les long muvim ol pipel bilong mi. Tasol mipela i no gat sans. Ating bihain long 20 yias,

ailan bilong mipela bai go daun long wara. Em i wok long kamap nau na ol pipel i wok long mekim ol si wol o mekim simen banis arere long nambis,” Mista Tong i tok.

Sif Eksekutiv Opisa bilong Grin Pis Pasifik, David Rither i tok Australia na Nu Silan i no ken lukluk na sanap nating taim ol pipel bilong Pasifik i kisim taim.

“I no asua bilong ol tarangu liklik ailan kantri long kamapim klaimet senis. Ol liklik kantri olsem Kiribati i kisim taim bikos long eksen bilong ol bikpela kantri.

“Mipela i laik Australia na Nu Silan i sapotim mipela long mun Desemba taim mipela i bung long Paris, long kantri Frens long toktok long klaimet senis wantaim ol wol lida,” Rither i tok.

# Klaimet senis sotim kaikai I kam long pes 1...

“Planti ol liklik manmeri bilong Pasifik ailan i save stap long ples. Tasol nau ples bilong ol i wok long bagarap. Ol i nidim sapot bilong yumi. Yumi mas sanap wantaim na helpim ol pipel bilong yumi na larim ol i gat gutpela sindaun,” Mista O’Neill i tok.

Yuropen Yunion (EU) Komisina bilong klaimet eksen na eneji, Miguel

Arias Cañete, i tok 57 kantri husat i save kamautim moa long 61 pesen GHG i wanbel long daunim mak o level bilong GHG i kamaut long ol faktori.

Planti ol EU kantri i save kamautim GHG. Tasol Mista Cañete i sainim wanpela agrimen aste wantaim foapela kantri long wokbung wantaim long kirapim

gutpela sos bilong eneji na pait egensim klaimet senis.

“Long yia 2030, EU i wanbel long katim daun 40 pesen GHG. EU i sapotim Pasifik Ailan long daunim level bilong hot i kam daun long 1.5 digri selsies,” Cañete i tok.

PIF bung i stat long Mande na bai pinis long Fraide.



Kaikai sot long kaimet senis.

# Liklik ailan kantri bai pait egensim klaimet senis

**Aja Potabe i raitim**

OL lida bilong ol liklik Pasifik Ailan kantri o smol ailan stets (SIS) i sanap wantaim long pait agensim ol birua klaimet senis i wok long kamapim.

Presiden bilong Palau Tommy Remengesau Jr i tokim ol nius manmeri long Mande olsem ol SIS kantri insait long Pasifik rijon i sanap strong long toktok long klaimet senis.

Mista Remengesau Jr em i siaman bilong SIS na em i kam long 46 Pasifik Ailan Forum (PIF) bung i kamap long Septemba 7-11 long Pot Mosbi.

Em bin sindaun wantaim Praim Minista bilong Tuvalu Enele Sopoaga na Seketeri Jeneral bilong PIF Dame Meg Taylor na tokim ol nius manmeri long sampela samting ol liklik ailan kantri i wok long mekim long sevim pipel na kantri bilong ol.

Wanpela nambawan samting Presiden Remengesau Jr i tok em long ol birua bilong klaimet senis.

“Mak bilong solwara i go antap bikos long ol hevi bilong klaimet senis. Ol pipel bilong mipela long SIS bai kisim taim,” Remengesau Jr i tok.

Em i tok SIS kantri i tingting long tokim Australia long no ken yusim koul (coal) bikos smok bilong en i save bagarapim ples na kamapim klaimet senis.

Dame Meg i tok PIF i stap baksait long SIS bikos dispela hevi em i wanpela bikpela hevi na salens bilong olgeta Pasifik Ailan kantri.

“PIF bai sapotim SIS. Klaimet senis birua em i hevi bilong yumi olgeta Pasifik ailan,” Dame Meg i tok.

Mista Sopoaga i sapotim Mista Remengesau Jr na em i tok SIS bai askim ol bikpela kantri olsem Australia long noken yusim fosil fiul long kamapim pawa na eneji saplai.

# NRI laik gavman i stretim gen SWF

**Aja Potabe i raitim**

NESENEL Risets Institut (NRI) i singautim gavman long senisim Ogenik Lo bilong Papua Niugini Sovren Welt Fan (PNG SWF).

Dairekta bilong NRI Dokta Charles Yala i tok NRI i laik gavman i lukluk gen long PNG SWF straksa na stretim gen long larim infrastraksa developmen fan i stap.

Aninit long straksa bilong PNG SWF we NRI i bin kamapim, i gat tripela fan bilong PNG SWF. Ol dispela fan em infrastraksa developmen fan, stebilasesen fan na fiutsa jeneresen fan.

Infrastraksa developmen fan em i mani bilong kirapim ol rot, bris, na ples balus. Stebilasesen fan em i mani bilong balensim gavman mani na ikononi bilong kantri sapos global ikononi krais i kamap o sapos prais bilong gol o ges na wel i kam daun.

Fiutsa jeneresen fan o seving fan em i mani bilong sevim long yusim long bihain taim.

“Dispela tripela fan inap long kamapim PNG SWF. Tasol infrastraksa developmen fan ino stap long Ogenik Lo gavman i bin kamapim,” Dokta Yala i tok.

Dokta Yala i tok infrastraksa developmen fan em i wanpela nambawam fan o mani gavman i mas putim long sait long kirapim ol rot, bris na ples balus insait long kantri.

“NRI i luksave long ol developmen gavman i wok long mekim. Gavman i mekim planti nupela rot na tu stretim gen ol olpela rot na bris insait long kantri.”

“Bikpela bris bilong yumi long Pot Mosbi na Lae i wok long senis. Ples balus tu i wok long senis bikos gavman i givim mani long stretim ol dispela namba wan infrastraksa.”

“Em i gutpela tru. Mi amamas long gavman i kirapim ol dispela samting. Tasol NRI i laikim gavman long stretim gen Ogenik Lo bilong PNG SWF na larim infrastraksa fan i stap bikos dispela bai larim mani bilong kirapim infrastraksa i stap,” Dokta Yala i tok.



Olgeta lida bilong Pasifik Ailan i kam bung long namba 46 PINA konfrens hia long Getwe Hotel Pot Mosbi. *Poto: Nicky Bernard*

## A SMART SOLUTION FOR SMALL BUSINESS

### Mobile & Internet Banking

Make supplier payments, transfer funds, pay workers and manage accounts anytime, anywhere.

### EFTPoS

Safer, convenient solution for you and your customers. Reduces risk of cash handling and builds financial history.

### Smart Business Debit Card

Make payments for goods and services and withdraw cash via the ATM and EFTPoS with your Smart Business Debit Card.

### PLUS - Smart Business Loan

By having a Smart Business Package Account, you can have access to a Smart Business Loan.

## BSP Smart Business Package

offers essential products that can help SMEs manage business funds and provides a pathway for growth.

**NOW OPEN**

BSP SME Business Centre  
Waterfront Place Shopping Mall,  
Port Moresby.



320 1212 / 7030 1212 - 24/7  
servicebsp@bsp.com.pg  
www.bsp.com.pg



**Riviu bilong dispela wik...**

**Skul mas stat gen - Goroka**

MINISTA bilong Haia Edukesen, Risets Sains na Teknologi, Malakai Tabar, i givim las singaut long ol sumatin long Yunivesiti bilong Goroka (UOG) long statim klas asde.

Minista Tabar i mekim dispela toktok bihain long ol sumatin i sakim tok bilong em long statim klas long dispela wik.

Minista i salim tupela opisa bilong em long go long UOG na kisim wanpela petisen.

Minista i tok i gat ol rot long bihainim aninit long Seksen 152 bilong Haia Edukesen (Jenerel Provisen) Ekt 2014, na i saspensim Vais Sensela (VC) na bai makim wanpela ekting VC.

Long dispela as, Minista i laik ol sumatin i mas statim klas gen.

**Polis i tok lukaut long skul - Rabaul**

IS Nu Briten polis komanda Suprintenden, Anthony Wagambie Jr i tok lukaut long ol sumatin long Yunivesiti bilong Naturel Risos na Enviromen (UNRE) long bihainim ol trupela rot long stretim ol hevi long skul.

Komanda Wagambie i mekim dispela toktok bihain long ol ripot i kamap long ol pait namel long ol sumatin na ol wokman long edministresen.

Em i tok polis i kisim ripot olsem ol publik samting na ol woklain i kisim bagarap.

Em i tok polis bai go insait long skul na mekim save long husat i kirapim hevi tasol bai ol i no wokim nating.

**Ailan long WBNP i kisim helpim - Kimbe**

OL pipel long Bali-Witu i kisim bikpela bagarap long strongpela san na i kisim ol kaikai long Wes Nu Briten provinsal gavman.

Provinsal disasta komiti i bung las wik long helpim 17, 650 pipel husat i sot long kaikai na wara.

Ol i painim aut olsem ol dispela pipel i kisim bikpela bagarap na ol i mas kisim helpim long gavman.

**Kampani i helpim SHP**

SAINA Kontreka COVEC (PNG) i helpim ol hap long Sauten Hailans provins (SHP) i kisim bagarap long strongpela san na ais i pundaun.

Kampani i givim K30, 000 long baim ol kaikai na ol samting long helpim ol pipel long las wik.

Projek Menesa bilong COVEC, Tony Liu, i tok ol i harim olsem ples i drai na ais i pundaun long dispela na ol i laik helpim ol pipel.

**Memba bilong NASFUND bai kisim fri SIM**

**Philemon Tame i raitim**

**BIKPELA mobail sevis long Papua Niugini, Bmobile-Vodafone, i bung wantaim Superannuation Fund (NASFUND) long givim fri sim Bmobile-Vodafone i go long ol memba bilong NASFUND.**

Ol dispela fri sim i gat fri yunit insait na as tingting bilong givim dispela sevis em bilong ol memba bilong NASFUND i ken yusim mobail fon long mekim isi na kwik trenseksen wantaim NASFUND.

Ol memba bilong NASFUND bai givim membasip kad bilong ol long Bmobile-Vodafone desk long NASFUND senta long kisim fri sim bilong ol wantaim wanpela smat pon ol bai givim diskaun.

Ol memba husat bai kisim fri sim bai givim nem bilong ol long databes long kisim fri apdet bilong akaun balens bilong ol insait long wan wan mun.

Grup CEO bilong Bmobile-Vodafone, Sundar Ramamurthy i tok, "Netwok bilong mipela bai larim yupela long mekim kol i go antap olsem long 90 pesen pipel long PNG na mipela bai makim mani mak we yupela bai wanbel."

"Ol kastoma bilong mipela long olgeta hap bilong PNG bai mekim fri kol aninit long sevis



bilong mipela na em bai kisim liklik taim tasol long sasim fon long sekim supafand balens na mekim ol narapela samting wantaim fon bilong yupela," Mista Ramamurthy i tok.

CEO bilong NASFUND, Ian Tarutia, i tok, "Dispela patnasip i skruim Bmobile-Vodafone i go insait long lista bilong ol kopret kampani na bai givim bikpela sevis long ol memba bilong NASFUND."

Dispela patnasip bilong Bmobile-Vodafone na NASFUND i

makim moa long 500, 000 pipel.

Long bungim dispela mak, ol bai skruim sevis bilong ol i go long olgeta hap bilong kantri.

"Bilong yusim fon em i no hat tru, nogat.

Olgeta pipel i seva klia long yusim fon na namba wan samting we mipela i laikim long en em ol memba bai amamas nau na kisim NASFUND notifikesen bilong ol long fon long wanem hap ol bai stap," Misa Tarutia i tok.

(R-L) Grup CEO bilong bmobile-vodafone, Sundar Ramamurthy, na COO bilong NASFUND Warwik Vele, i mekim patnasip bilong bmobile-vodafone na NASFUND long mekim laip isi long ol memba bilong NASFUND. Foto: Philemon Tame

Dispela sevis bai mekim isi tru long ol memba i ken kisim risal bilong ol, na ol bai no inap long westim taim na i go long ol hap bilong NASFUND long olgeta senta bilong PNG.

Ol memba husat i gat asua long eplikesen bai kisim tok save long fon tu.

Em i no gutpela we ol memba i save bihainim longpela lain long kisim sevis bilong ol. Long dispela as, dispela patnasip bai mekim isi long ol kastoma na ol wokman tu.

**Hawa pipel redi long wokbung**

**Aja Potabe i raitim**

OL pipel i redi long wokbung wantaim gavman na lukautim gavman sevis sapos gavman i opim gen Hawa Haus Kalabus long Tari, Hela Provins.

Hawa komyuniti lida Bobby Mangobe i tok ol pipel long ples i laikim tru CS Minista Jim Simatab i opim gen Hawa haus kalabus.

"Mipela pipel bilong Hawa i redi long wokbung wantaim ol woda na CS dipatmen sapos

Hawa haus kalabus i op gen.

"Mipela i laik sapotim wok bilong CS long nupela Hela provins. Lo na oda asua na hevi i save kamap long Hela olgeta taim na mi pilim olsem Hela i nidim wanpela haus kalabus.

"Mi makim maus bilong ol pipel long Hawa na toktok. Ol pipel i les pinis long trabel na pait. Ol i laikim bel isi na ol pipel i laik stap isi. Mipela i laikim stretim gutpela sindaun long ol pipel long ples," Mangobe i tok.

Mangobe i tok bikpela pait i bin kamap long Hawa na i bagarapim laip na sindaun bilong ol manmeri.

Dispela pait i bin pasim rot bilong gavman long opim gen haus kalabus.

"Nau pait i pinis. Ol pipel i go bek long Hawa na tingting long statim gutpela sindaun gen. Ol i laikim CS Minista Jim Simatab long opim gen haus kalabus," Mangobe i tok.

Insait long Hela yet, planti lo na oda asua i wok long kamap

nau yet. Nius ripot i tok sampela man i bin brukim banis na i go insait long haus bilong wanpela pasta meri na stilim ol samting bilong sios.

Dispela hevi i bin kamap long Tega Ipa insait long Tari taun stret long sampela mun i go pinis.

Long Fugwa long Koroba-Kopiago ilektoret, wanpela man i bin lusim laip bilong en insait long haus lotu taim birua ol i kilim em insait long sios.

**Ol wod Kaunsil memba kisim moa mani**

NESENEL gavman bilong i bin tokaut long peirol sistem bilong givim moa alawens long ol wod memba na ol wod rekoda long ol Lokal Level Gavmen .

"Nesanel Eksketiv Kaunsil (NEC) mekim disisen long givim sampela moa miting alawens long ol Lokal Level Gavman (LLG) lida long 2014 bihainim polisi we Deputi Praim Minista na Minista i bosim Provinsal na Lokal Level Gavman," Minista Dion i tok.

"Em i namba wan taim long ol LLG lida i kisim sampela luksave long hatwok ol i save mekim long strongim develop-

men bilong dispela kantri wantaim lidasip bilong ol long komyuniti level," Mista Dion i tok.

Mista Dion i makim maus bilong Ministri, Dipatmen na Lokal Level Gavman Lida long kantri na i tok tenkyu long Praim Minista Peter O'Neill na ol narapela minista husat i mekim disisen long apim ol alawens bilong ol LLG memba na opisa.

"Yumi long PNG i save lusim tingting hariap long wanem samting i kamap na yumi no save givim gutpela luksave long husat i stap baksai long ol wok i kamap. Tasol yumi save hariap

long daunim ol lida bilong yumi na sutim tok nating long laik bilong yumi yet. Gavman bilong Praim Minista O'Neill i save mekim wok wantaim gutpela tingting olsem na mipela bai wokim stret samting we mipela i bilip i gutpela long ol pipel na ol sistem bilong gavanens long provinsal na Lokal level gavman," Mista Dion i tok.

Dispela polisi em i go wantaim developme polisi i lukluk long ol provins, distrik na LLG. Tok orait bilong DDA Ekt na kamap bilong bilong Distrik Developmen Atoriti em i bikpela hap bilong dispela polisi. Em bi-

long strongim na mekim gut ol sevis i go long ol pipel long rurel ples long ol i mas stap gut wantaim bel isi na wanbel pasin.

"O'Neill-Dion Gavman i wok long lukluk stretim sindaun bilong ol Lida i go pas long ol pipel na husat i givim laip bilong ol long helpim ol pipel long ol rurel ples bilong kantri na ol bai mekim olsem yet long taim gavman bilong i wok long ranim kantri yet," em i tok.

Mista Dion i tok tu olsem bihain liklik bai ol i tingting tu long stretim ol Len Midieta husat i save givim taim bilong ol long stretim ol toktok bilong graun we i bikpela tumas long kantri.



# PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: [www.pih.com.pg](http://www.pih.com.pg)

## PIHkinini Smile coming October 18

**Cleft Lip and Cleft Palate are birth defects that occur when a baby's lip or mouth do not form properly during pregnancy.**

Globally, it is said to occur in one in 700 babies. Transposed into the PNG demographics, this could mean about 300 babies born each year in PNG might have it.

The Pacific International Hospital along with Operation of Hope believes that every child suffering from cleft lip and cleft palate deserves exceptional surgical care. We dream of a world where no child suffers from lack of access to safe surgery.

Last December 2014, about 38 patients, mostly young children from all over PNG, got to benefit from the free surgeries of Pacific International Hospital and Operation of Hope. The team consisted of Dr. Roy Kim of San Francisco, USA, the surgeon who was in charge of the operations, and assisted by the father-and-son team of Dr. Kevin and Dr. Luke Wright, and three nurses of OOH. The Operating Rooms of the then-PIH at 4-Mile were all used for OOH for a week, and Dr. Paul Alexander of PIH led the support effort of PIH, as well as two PIH nurses on duty in the wards of OOH patients at any given time, as well as OT nurses participating in the OT room. Operation of Hope will return to PNG on October 18, and we are now in the final stages of compiling the patient list for this, so do send texts already to 7155-8866 and register your patient.

Remember, Pacific International Hospital may be located in Port Moresby, but this is offered to patients from all over PNG. Many generous and kind-hearted sponsors support the patient and guardian to fly to Port Moresby for the operation. The marketing dept. of PIH have been coordinating all these efforts to bring the patients to Moresby. This 2015, as of this writing we are glad to have the confirmed support of Bougainville Copper Limited, Brian Bell, Rimbunan Hijau (RH), Airlines PNG, and MP Ken Fairweather of Sumkar Dist. Madang. We are now in the final stages of making the patient list for 2015, please text us immediately on 7155-8866 and pass us the information on your cleft lip or cleft palate patient.



**Noel Gunip of Karkar Island from Madang, just to illustrate to you the condition. Noel was able to fly to Moresby in July 2015 for a preliminary assessment, with the assistance of Sumkar District Madang MP Ken Fairweather, along with accommodation assistance from Jamie Maxtone-Graham.**

How does a child come about to have a cleft lip (or sometimes referred to as a "hare lip") or cleft palate? There has been no definitive proof that singles out a particular cause, but there seem to be a variety of factors that play a part. Also known as "orofacial cleft," a baby may have only cleft lip, or only cleft palate, or both. This occurs early during a pregnancy. What happens that leads to this?

A baby's head forms early during pregnancy. To make the face, body tissue and special cells from each side of the head grow toward the center of the face and join together. This joining of tissue forms the facial features, like the lips and mouth.

The lip forms between the fourth and seventh weeks of pregnancy. A cleft lip happens if the tissue that makes up the lip does not join completely before birth. This results in an opening in the upper lip. The opening in the lip can be a small slit or it can be a large opening that goes through the lip into the nose. A cleft lip can be on one or both sides of the lip or in the middle of the lip, which occurs very rarely.

The roof of the mouth (palate) is formed between the sixth and ninth

weeks of pregnancy. A cleft palate happens if the tissue that makes up the roof of the mouth does not join together completely during pregnancy. For some babies, both the front and back parts of the palate are open. For other babies, only part of the palate is open.

**Possible root causes**

There is no single definitive particular cause that has been isolated.

There is some research that points to some possible genetic cause, but the point is it is surely not the sole cause, since this can appear in a baby whose families for several generations had never had a case.

Another potential cause may be related to a medication a mother may have taken during her pregnancy. Some drugs may cause cleft lip and cleft palate. Among them: anti-seizure/anticonvulsant drugs, acne drugs containing Accutane, and methotrexate, a drug commonly used for treating cancer, arthritis, and psoriasis.

Cleft lip and cleft palate may also occur as a result of exposure to viruses or chemicals while the fetus is developing in the womb.

One source notes that the

risk also increases when an expectant mother is drinking alcohol or smoking. In our previous article "Fresh Hopes for Expectant Mothers" (Wantok, 30 April) we noted that when the mother is obese, it could actually lead to the baby developing cleft palate.

**What Problems Are Associated With Cleft Lip and/or Palate?**

**Eating problems.** With a separation or opening in the palate, food and liquids can pass from the mouth back through the nose. Fortunately, specially designed baby bottles and nipples that help keep fluids flowing downward toward the stomach are available. Children with a cleft palate may need to wear a man-made palate to help them eat properly and ensure that they are receiving adequate nutrition until surgical treatment is provided.

**Ear infections/hearing loss.** Children with cleft palate are at increased risk of ear infections since they are more prone to fluid build-up in the middle ear. If left untreated, ear infections can cause hearing loss. To prevent this from happening, children with cleft palate usually need special tubes placed in the eardrums to aid fluid drainage, and their hearing needs to be checked once a year.

**Speech problems.** Children with cleft lip or cleft palate may also have trouble speaking. These children's voices don't carry well, the voice may take on a nasal sound, and the speech may be difficult to understand. Not all children have these problems and surgery may fix these problems entirely for some. For others, a special doctor, called speech pathologist, will work with the child to resolve speech difficulties.

**Dental Problems.** Children with clefts are more prone to a larger than average number of cavities and often have missing, extra, malformed, or displaced teeth requiring dental and orthodontic treatments

**Social Problems** – as many parents of the PNG patients of OOH related, many of the kids had to suffer the stigma of being treated as "different" from other kids, that there might be something terribly wrong with them because they looked that way. Or, they could be laughed at

because of their speech impediments. Some of them, like the 14-year old girl from West New Britain, were with very withdrawn and overly-shy personalities, almost like wanting to run away and hide from other people, and they already got used to acting that way.

**What's the Treatment for Cleft Lip and Cleft Palate?**

A cleft lip may require one or two surgeries depending on the extent of the repair needed. The initial surgery is usually performed by the time a baby is 3 months old.

Repair of a cleft palate often requires multiple surgeries over the course of 18 years. The first surgery to repair the palate usually occurs when the baby is between 6 and 12 months old. The initial surgery creates a functional palate, reduces the chances that fluid will develop in the middle ears, and aids in the proper development of the teeth and facial bones.

Children with a cleft palate may also need a bone graft when they are about 8 years old to fill in the upper gum line so that it can support permanent teeth and stabilize the upper jaw. About 20% of children with a cleft palate require further surgeries to help improve their speech.



Once the permanent teeth grow in, braces are often needed to straighten the teeth.

Additional surgeries may be performed to improve the appearance of the lip and nose, close openings between the mouth and nose, help breathing, and stabilize and realign the jaw. Final repairs of the scars left by the initial surgery will probably not be performed until adolescence, when the facial structure is more fully developed.

For Operation of Hope, the group prioritizes lining up children for cleft palate surgery when they are from 1 year old to 6 years old. For cleft lip, it could be from infancy up to adulthood, but, the patient should not have undergone any previous surgery to attempt to correct it.

Once again, you may contact us on 7155-8866 or like FB page of Pacific International Hospital, or the FB fan page "PIHkinini Smile" or email to [joel\\_marketing@pihpng.com](mailto:joel_marketing@pihpng.com). Or call Joel on 79988000 ext. 142.

## Be part of the top-tier facility of your profession!!



**Nurses, Midwives, and CHW welcome to apply**

send your CV to [supriya\\_hr@pihpng.com](mailto:supriya_hr@pihpng.com) or text 7155 8866



# Oi sumatin bilong Australia bai stadi long PNG

**AUSTRALIA** i tokaut long Nupela Kolombo Plen long sapotim 46 Australia sumatin bai slip na stadi na mekim wok long Papua Niugini neks yia.

Oi sumatin bai stadi long planti sabjek olsem Histori long Pasifik Edventis Yunivesiti, Entropoloji long Yunivesiti bilong Papua Niugini na ol Medikol stadi long Namatanai Distrik Haus sik, Pot Mosbi Jenerel Haus sik, Wewak Haus sik na Alotau Provinsal Haus sik.

Oi sumatin bai kisim ekspirians long wok ples bilong PNG taim wok wantaim ol o bai ol i skulim ol. Bai ol i go bek long Australia wantaim nupela lukluk na save gut long PNG na nupela ol pren pasin bai kamap.

Oi yunivesiti i stap insait long dispela plen em, Deakin Yunivesiti, James Cook Yunivesiti na Yunivesiti bilong Wol-longong.


“Dispela nupela projek bai soim ol sans bilong ol sumatin

long Australia long go het long akedemik na ol laip ekspirians long stadi na painim wok long PNG.” Australia Hai Komisina long Papua Niugini, Bronte Moules i tok.

“Dispela nupela plen em i sain bilong gavman bilong Australia long apim save bilong Indo-Pasifik long sapotim ol sumatin bilong Australia long stadi na wok insait long rijn long 38 hap insait long indo-Pasifik rijn,” Moules i tok.

Long Jun, PNG i kisim 7-pela sumatin long trening tisa long Oro provins. Oi sumatin long Federesen Yunivesiti long Australia i wok wantaim ol lokal tisa long Kokoda Elementri skul na Kokoda Skils Trening Senta wantaim sampela ol sumatin long 10-pela de lidasip developmen trek long Kokoda Trek.

Dispela projek i op long ol sumatin bilong Australia long olgeta sabjek, na i gat ol sot-pela tem raun na semesta bes stadi na intensip.



Oi namba wan sumatin bilong Australia i go long PNG aninit long Nupela Kolombo Plen long wanpela welkam kaikai long Australia Hai Komisina long Pot Mosbi.



Kopret Afes Menesa bilong Britis Ameriken Tobako, Albert Veratau i givim sek mani long Sif Eksekutiv Opisa bilong NDB Invesmen, Des Yaninen. Poto: Gloria Bauai

## Sapotim yut program

**Esther Bralyn Wani i raitim**

NESENEL Developmen Benk (NDB) i kamapim Entraprunel Yut Samit program bilong ol yangpela long painim rot long wok bisnis sapos ol i no mekim gut long skul o i no pinisim skul.

Lain bilong Britis Ameriken Tobako (BAT) i sapotim dispela Yang Entaprais Skim wantaim sek mani inap long K25, 000.

Kopret Afes Menesa bilong Britis Ameriken Tobako, Albert Veratau i tok, “Mipela tokaut long sapot bilong

mipela long dispela program. Na mipela i amamas long kamap hap bilong dispela yut program.”

Mista Veratau i tok ol i sapotim dispela program bikos long tupela as; i gat bikpela populesen bilong ol long kantri na ol i save gut long ol nupela teknoloji. Em i tok ol dispela yut bai go het long ranim kantri bihain.

Long wankain taim, Sif Eksekutiv Opisa (CEO) bilong NDB Invesmen, Des Yaninen, i tok ol laik harim wari bilong ol yut.

“Mipela laik luksave

long wari bilong ol yut bikos long 4-pela rot, givim strong long ol yangpela pipel, kamapim wanpela hap we ol yangpela i ken stretim wari bilong ol, kamapim planti hap bilong ol na soim ol sans o rot bilong wok bisnis.”

Dispela program i kamap long Pot Mosbi tasol na neks yia bai go aut long ol narapela provins.

Oi yangpela i ken kisim liklik mani inap olsem K500 na bikpela mani inap olsem K100, 000 long helpim ol long statim bisnis.

## Oi sumatin mas lainim “World’s Largest Lesson”

**GLOBEL Gol kempen na UNICEF i opim World’s Largest Lesson o bikpela Skul long Wol long las wik Fraide. Dispela tingting long skulim ol pikinini long 100 kantri long nupela Sastenebel Developmen Gol UN Jenerel Asembli i kamapim.**

Olsem hap bilong Globel Gol, World’s Largest Lesson bai kisim ol pikinini na ol yangpela pipel long bildim sastenebel bihain bi-

long olgeta sitisen. Dispela tingting i pulim sapot bilong ol bikpela man na meri olsem Eminen Edvoket bilong UNICEF Kwin Rania Al Abdullah bilong Joden; ol embeseda bilong UNICEF, Nancy Ajram na Serena Williams.

“Dispela program bai skulim ol pikinini moa long ol globel gol. Em bai kisim ol long winim ol dispela gol na skulim ol long ol salens long bihain, na givim ol gutpela skul toktok long

kamapim senis long ol komyuniti bilong ol.” Eksekutiv Daireka bilong UNICEF, Anthony Lake i tok.

Oi bai holim ol World’s Largest Lesson long ol klasrum long wol long wik bilong Septemba 28 long dispela yia. Olsem 500 milien sumatin long wol namel long 8 na 14 bai gat sans long lainim ol Globel Gol, long stopim pasin bilong nogat mani na kaikai long olgeta pipel, stopim klaimet senis, na givim olgeta sumatin wanpela gutpela praimer na sek-

enderi edukesen.

Oi gavman lida na ol minista long sampela kantri bai skulim na stap insait long dispela skul toktok.

“World’s Largest Lesson i gutpela sans long tokim ol sumatin long olgeta hap long wanem em Globel Gol na ol i ken mekim wanem long winim dispela,” papa bilong Globel Gol kempen, Richard Curtis i tok.

Mista Curtis i tok olsem em bai

gutpela sapos olgeta tisa bai luksave olsem olgeta skul i lainim World’s Largest Lesson.

“Taim yumi mekim Globel Gol bikpela, yumi ken givim ol gutpela sans long wok long wol na helpim yumi ol namba wan jeneresen long stopim pasin bilong nogat mani na kaikai, long stopim injustis na inikwalati, na yumi bai kamap laspela pipel long kisim bagarap long klaimet senis,” Mista Curtis i tok.

# Ol sik pikinini kisim nupela pilai ples

**OL sik pikinini husat i save stap long haus sik long wetim marasin long kamap orait i save tait long stap tasol nau BSP Benk i kirapim wanpela pilai graun bilong ol ausait tasol long wod bilong ol pikinini long Pot Mosbi Jeneral Haus sik (PMGH).**

BSP brens long Waigani i go pas long stretim na putim ol samting bilong pilai long dispela pilai graun. Ol wokman bilong benk na ol haus sik lain bilong PMGH i bin opim dis-

pela long las wik Fraide.

Sif Eksekutiv Opisa bilong Haus sik CEO Grant Muddle i bin stap long taim bilong opim pilai graun na em i givim bikipela tok tenkyu i go long BSP long dispela projek bikos em bai helpim tingting bilong ol yangpela sik pikinini long kamap orait hariap.

“Mi tok tenkyu long BSP long taim na wok bilong ol long kamapim dispela projek. Mipela wokim pinis bikipela senis long

haus sik tasol i no gat wanpela hap bilong ol pikinini stret long pilai insait long eria bilong haus sik yet. Dispela pilai graun bai kamap tru olsem wanpela spesel ples bilong ol pikinini,” Mista Muddle i tok.

Dispela pilai graun i gat ol slaid, swing, siso na tupela brens bilong BSP long Pot Mosbi, Waigani Draiv na Waigani Benking Senta i putim olsem komyuniti projek bilong ol.

Long taim bilong givim pilai graun i go long haus sik, Brens

Menesa bilong Waigani Draiv, Jeffrey Singer i tok BSP i amamas long sapatim haus sik long mekim ol pikinini i amamas.

Em i tok long ol kain komyuniti projek olsem, benk i save givim tingting long ol pikinini long stap helti na strong.

BSP i givim planti helpim long Pot Mosbi Jeneral haus sik long planti yia. Sampela bilong ol dispela projek:

2009: Klinim olgeta hap bilong

Wod bilong Pikinini we ol wokman na meri bilong benk i brumim na mopim plua, senisim ol flai waia, senisim ol laplap bilong windoa, ol bed sit na ol skin pilo

2010: Stretim gut pidiatrik eksemisenesen wod

- 2010: Stretim TB Wod
- 2011: Stretim Sejikal Wod
- 2012: Stretim Kadiotorasik Wod



Ol pikinini traim ol pilai samting long pilai graun.

## VHV Program asesmen na impruvmen woksop

WORLD Vision wantaim Nesanel Dipatmen bilong Helt (NDoH) i bin bung na holim wanpela Viles Helt Volantia (VHV) Program Asesmen na Impruvmen Matriks woksop long Madang long Septemba 2 na 3.

Dispela woksop em i statim wanpela VHV Program Monitoring Fremwok long Madang na long Atonomas Rijon bilong Bogenvil (AROB). Wanem samting i kamap long dispela woksop bai givim fremwok na wok bilong mekim ol gavman na ol ogenaisesen long sevei, asesim na wokim gut wok bilong VHV programs.

Provinsal Helt Edvaisa bilong Madang, Marcus Kachau i bin go pas long opim dispela tupela de woksop we 18 VHV bilong Sumkar na Madang distrik i bin kamap long kisim trening.

“Ol VHV i save mekim bikipela wok long helpim ol helt opisa long ol komyuniti long bringim helt sevis i go long ol pipel. Wantaim dispela nupela save na ol eksen plen ol i kisim long dispela woksop bai sapatim na kamapim gut helt sistem na wok bung i bringim gutpela helt sevis long ol ruel komyuniti,” Mista Kachau i tok.

Nesanel Dipatmen bilong Helt wantaim World Vision na Ruel Pramereri Helt Sevis Deliveri i bin apdetim VHV Trena Buk. Lukluk bilong dispela buk em i go long viles, komyuniti helt na gutpela sindaun.

Insait long woksop ol i bin lukluk long wanem kain stap bilong ol VHV long ol wan wan distrik, VHV monitoring Fremwok, matriks bilong wok bilong program na ol narapela samting moa.

VHV monitoring fremwok em i save helpim nesanel o provinsal plena long luksave long wanem hap ol wok bilong VHV program i stap long provins.

Fremwok i helpim ol Non-Gavman Ogenaisesen, sios helt sevis, gavman program menesa, VHV na ol supavaisa long sekim ol VHV program bilong ol yet wantaim piksa bilong ol gutpela kain program i stap pinis long narapela hap.

## Celebrate our 40th Independence with PNG MADE world-class tuna





Mi hamamas lo wok wantaim RD Tuna Cannery bikos emi save provaidim olgeta samting olsem treinin na salim mipela go lo ol bisnis treinin tu insait lo kantri.

*Besim Wefin*  
Accounting Department



When there is a shipment of world class tuna being exported from RD Tuna Cannery, we must meet all government regulations to ensure they meet export quality standards as well in PNG.

*Caroline Wandil*  
Export Sales & Marketing Department



Mipela mekim gutpela produkt igat gutpela teist na kwalati wantaim we mipela inapim nid blo ol kastoma blo mipela insait long Papua New Guinea na world wantaim.

*Akikola Masu*  
Logistics Department



I work at RD Tuna Cannery as a Technical Assistant. My job requires of me to conduct validations on company's procedures. I am proud of the quality products produced by RD Tuna Cannery.

*Benjamin Siming*  
Technical Services Department

**RD Tuna Cannery, Ltd**  
Current Certifications and Regulatory Approvals

# SNPS i painim Mis Sains pinis

**Esther Bralyn Wani i raitim**

SKUL bilong Nuturel na Fisikel Sains (SNPS) insait long Yunivesiti bilong Papua Niugini (UPNG) i holim Sains Biuti Pejen bihain long Sains Fe i kamap long tupela de long makim 50 Jubili bilong skul.

Ol sains sumatin i go pas long selebretim 50 yia Jubili bilong yunivesiti long Septemba 3 inap long 4 las wik.

Eksekutiv Din bilong SNPS, Profesa Peter H Petsul i tok, "Ol sumatin i mekim gut stret long liklik hap bilong ol long selebretim dispela 50 yia Jubili bilong skul. Planti sumatin long Kila Kila Sekenderi, Gerehu Sekenderi na Pom Nats i kam long lukim ol.

Long Sarere nait ol sumatin i kamap wantaim naispela bilas long resis long kamap Mista na Mis Sains. Bihain long dispela bai ol i resis wantaim ol narapela bikpela skul long kamap Mis UPNG.

Namel long ol Sains i gat 6-pela divisen we ol i resis long en, dispela em Baioloji, Kemistri, Enviromen Sains na Jiografi (ESG), Jioloji, Mets Stetistiks Kompyuta Sains na Fisiks.

Mista Petsul i tok olgeta i resis long kamap kwin tasol wanpela sumatin long ESG, Mary Konobo i kamap kwin bilong SNPS.

Dispela program i bin kamap gut tru na nogat hevi i bin kamap insait long tripela de. Ol sumatin i bin amamas stret long pinisim Fe program wantaim resis long kamap kwin program.



Wanpela meri i bilas gut stret long resis long kamap kwin. Kwin bilong Sains, Mary Konobo i mekim toktok long dispela nait.



# Ol wok meri bilong REL smat tru wantaim nupela yunifom

**James G. Kila i raitim**

**TAIM yu wok wantaim yunifom bilong kampani yu karim nem bilong kampani na bai yu pilim nais stret.**

Ating ol dispela lain meri long poto i mas pilim nais tru long werim nupela yunifom na mekim wok

Ol dispela meri i save wok wantaim Raibus Enjiniaring Limited (REL), wanpela lokal kampani bilong ol papagraun bilong Ramu Nikel Projek long Madang provins. Raibus em karim nem bilong Raikos na Usino-Bundi distrik long we Ramu NiCo projek i gat ol op-eresen bilong en i stap long Madang provins.

Ekting jeneral menesa bilong REL, Brodney Seip i tok kampani i baim ol nupela yunifom bilong ol wokman na meri bilong en long Saina stret na bringim i kam long las yia.

Mista Seip i tok ol meri REL long Madang bes i gat narapela kain kala yunifom bilong wok em wait na braun na i gat ol straip o makmak long en.

Ol arapela wokman na meri long Kurumbukari Main na Basamuk Rifaineri em yunifom bilong ol i narapela bikos ol i

stap long projek eria. Ol meri long Madang bes i save wokim gutpela wok long klinim 'Glas Haus' bilong Ramu NiCo na tu wasim ol

samting na mekim ples i luk nais tru.

Planti ol meri bilong REL em ol lain bilong Madang na i gat wan wan bilong arapela

provins long PNG. Ol meri i amamas olsem ol i gat nupela yunifom we i soim stret kala bilong ol na planti taim ol i save pilim nais tru.



Ol meri REL luk smat wantaim nupela yunifom long Madang bes bilong Ramu NiCo (MCC). Poto: James G. Kila

# Kalsarel wik i brukim rekot



Ol sumatin long kalsarel wik insait long Pot Mosbi Netsa Pak.

SKUL program 'kalsarel wik' bilong Pot Mosbi Netsa Pak i pinis long Fraide wantaim bikpela namba bilong ol sumatin olsem 2,350 long 12-pela skul.

Edukesen Supavaisa bilong Netsa Pak, Amos Babaga i tok, "Kalsarel wik i bikpela samting we i save givim narapela kain edukesen program na ol sumatin inap lainim ol tumbuna pasin na ol rot long sevim kalsa na lukautim enviromen."

Mista Babaga i tok moa olsem 600 sumatin i go long Netsa Pak wan wan de, ol i stap insait long ol infomesen tebol, bungim ol animal na ol tumbuna stori. Dispela i bin namba wan taim bilong planti sumatin long harim ol tumbuna stori bilong PNG.

Namba bilong sumatin long dispela yia i winim ol narapela yia bikos mak long 400 tasol raun pastaim. Kalsarel wik i stap long namba tu yia na bai stap insait long edukesen kalenda bilong Pot Mosbi Netsa Pak long neks yia. Ol skul bai kisim ol dispela kalenda long stat bilong skul long Jenuari neks yia.

PNG LNG projek na Nesanel Kapitil Distrik Komisin (NCDC) i save sapotim dispela Skul Edukesen Program.

Long wankain taim, Jenerel Menesa bilong Netsa Pak, Michelle McGeorge i tok, "Netsa Pak i gat strongpela tingting long sapotim edukesen bilong pikinini long bihain. Mi laik tok tenkyu long Nesanel Misium, Institut bilong PNG Stadis na NCDC Trensport long stap insait long dispela program na helpim mipela."

Wanem skul laik stap insait long raun bilong Pot Mosbi Netsa Pak program i ken ringim Netsa Pak long 326 0258 na rejista na laikim Facebook pes.



# Stopim pasin long bagarapim ol Katolik Sios woklain

**SINGAUT i go long pablik long dispela kantri long stopim pasin bilong bagarapim na kilim ol Katolik Sios pater na sios wok manmeri.**

Pasin we ol strit prisa long Lae, Morobe provins i bin mekim long paitim Katolik Bisop Christian Blouin bilong Lae Daiosis i nogut tru i no go gut long planti memba bilong pablik long dispela kantri.

Pater Lucas Kambao, wanpela Luteran Sios memba na wanpela leksera long Gud Seped Semineri Fatima long Jiwaka provins i wanpela husat i egensim stret dispela pasin i wok long kamap long ol woklain bilong Katolik Sios long PNG.

Pater Lucas i tok Katolik Sios long PNG i mekim bikpela wok na kontribusen long developmen na givim sevis long dispela kantri na em i egensim stret pasin we ol strit prisa i mekim long paitim Bisop Christian wantaim ol ston samting.

"Katolik Sios em i wanpela olupela lotu long wol, na long PNG, em i namba wan sios long kism Gutnius i kam. Luteran Sios i kam bihain long em.

"Long taim sios i kamap long PNG, ol misineri i bin gat hatpela taim, tasol ol i bin sakrifaisim ol yet long yumi i ken gat gutpela laip na

sindaun tude. Moa long en, Katolik Sios i gat gutpela rekot long kism sevis i go aut, ol wok developmen long dispela kantri wantaim tu ol arapela bikpela sios.

"Dispela kantri i go het gut bikos long wok na kontribusen we Katolik Sios na ol arapela bikpela sios i mekim. Planti ol bikpela save manmeri i wok long gavman na praivet sekta i kism skul na save long ol skul we ol sios i papa long ol.

"Ol i kamapim Mama Lo bilong dispela kantri long ol sosel tising o skul bilong sios. Wanpela Sister i bin kontributim tingting na givim tok stia long meri i bin wokim plak bilong dispela kantri. Ol Katolik misineri i bin givim tingting na stia long ol lain i bin kamapim faundesen bilong dispela kantri. Planti i bin wokim sakrifais long kamapim ol humen risos o save wok manmeri bilong dispela kantri taim sampela koloniel masta i no mekim gut long ol pipel bilong yumi. Mi no ting olsem ol dispela maket prisa i bin stap long dispela taim," Pater Lucas i tok.

Em i tok i no long taim i go pinis, tupela pasto i bin kukim buk Baibel long Hagen taun, na nau yumi lukim wankain samting i kamap long Lae.

"I luk olsem ol man i wok long painim sans long kamapim ol grup i bihainim ol

olsem ol bi o ol binatang. Ol Katolik i save givim helpim na ol i no kism bek samting, tasol ol i helpim long developim o kamapim man i go gutpela wantaim ol risos bilong sios," Pater Lucas i tok.

Em i tok moa olsem, ol Kristen, yumi no autim tok bai kamapim birua na vailens, tasol toktok bilong bel isi, laik pasin na amamas.

"Gutnius i yunaitim ol pipel olsem ol pikinini bilong Bikpela, maski ol i gat ol kain kala, lotu na kantri ol i kam long en. Pasin ol i mekim long Lae i no kamap long laik bilong Bikman, tasol eksen i kamap long nogut na ivel tingting na lewa," Pater Lucas i tok.

Em i tok pasin we ol strit prisa long Lae i wokim i egensim pasin we Jisas i wokim husat i bin autim Tok bilong Bikpela i go long ol siklain, ol tarangu na ol lain i sot long samting.

Em i tok em i no lukim ol strit prisa i wokim wankain, na long pinis bilong em, ol lain i bihainim ol i pulap long pasin kros na bel hevi olsem dispela i kamap long Lae.

"Dispela i no bihainim Gospel mesej bilong Bikpela," Pater Lucas i tok.

"Mi bilip olsem bisop i no wokim wanpela tok i no stret o wokim asua long ol dispela strit maket prisa. Mipela ol pasto i save givim luksave long ol

narapela na i gat sori pasin.

"Pasin we ol dispela lain i wokim long Bisop Christian husat i abrusim 70 krismas na i wanpela lapun man i no ut tru. Mipela i wok bung wantaim na autim Tok bilong God. Olsem na mipela i gat ol ekumenikel sevis, bung na toktok wantaim," Pater Lucas i tok.

Em i tok Katolik Sios i save autim tok long helpim kamapim na developim gut man long olgeta eria bilong laip olsem fisikel, spiritual na sosel developmen.

Em i tok Sios i planim Tok bilong God long laip bilong ol pipel na kantri i lukim ol kaikai bilong em.

Em i tok long ol bus ples na longwe ples long dispela kantri, bai yu lukim wanpela Katolik skul, helt senta na pater i wok i stap.

"Pater i stap wantaim ol pipel. Mipela i no wokim bikpela nois o putim ol spika i pairap, tasol mipela i fokus long mekim long ol pipel na kam bek bilong em, ol gutpela samting i save kamap. Katolik Sios em i sios bilong pipel.

"Baibel i go daun pinis long paia, kilim pinis wanpela pater long Goilala, sutim narapela apter long Sepik Wara na nau, paitim bisop long Lae.

Pasin bilong mekim no gut long han i givim kaikai long yu i mas pinis nau," Pater Lucas i tok.



## Yau pas na maus pas

LONG Sande 6 Septemba 2015, yumi ridim Gutnius bilong Mak 7:31 – 37, stori bilong Jisas i mekim orait wanpela maus pas na yau pas man.

Namel long komyuniti bilong yumi, i gat kain sik man meri.

Sampela i gat sik taim mama i karim ol. Sampela i gat dispela sik bikos papa mama o manmeri bilong komyuniti i wokim kamap. I gat wanpela trupela stori.

Nem bilong em Edai.

Em i wanpela gutpela boi taim mama i karim em. Taim em i gat wanpela krismas, em i stat long toktok. Senis i kamap taim em i gat tripela krismas.

Olgeta taim em i mekim liklik rong, papa bilong em i paitim em no gut tru.

Taim em i wokim bikpela rong, papa i kism bikpela stik na paitim em, kikim em o apim em na tromoi em long graun.

Edai i stat long kamapim pasin pret insait long laip bilong em. Em i no inap toktok moa. Olgeta de em i sarap tasol. Em i kamap mauspas na yaupas man.

Taim em i gat 5-pela krismas, em i go long skul. Em i mekim gut olsem na ol i makim em i go long hai skul. Tasol em i stap mauspas yet.

Em i mekim gut long hai skul na em i winim i go long sekonderi skul. Maski em i maus pas tasol em i stadi hat tru.

Olgeta klasmet na wan skul bilong em i save olsem Edai i maus pas man. Olsem na planti i no laik prenim em.

Tasol namel long sumatin, Arua em klasmeit bilong Edai i stap.

Arua i sori long Edai na planti taim em i bungim na wokabaut o stap wantaim Edai.

Bihain em i kamap gutpela pren bilong Edai.

Wanpela de, Edai i askim Arua. Bilong wanem yu laik kamap gutpela pren bilong mi. Mi i no gutpela man. Mi no save toktok na mi no save harim gut tu. Moabeta yu painim narapela boi long kamap gutpela pren bilong yu.

Arua i no bekim askim bilong Edai. Em i smail tasol na i tokim Edai: "**Sapos yu laik, kam wantaim mi long Sarere na yumi go long Haus Lotu. Yut grup bilong mipela I gat felosip na ritim Tok Bilong God na serim. Sampela i save wokim testimoni bilong ol?**"

Pastaim Edai i tok no gat. Tasol Arua i no givap. Em i askim askim Edai olgeta Sarere na wanpela Sarere Edai i tok orait na i go wantaim Arua bihainim felosip long haus lotu.

Pastaim em i go na sindaun tasol. Bihain isi isi em i joinim ol long singim song na wokim prea. Em i amamas long harim Gutnius na harim narapela yut i wokim testimoni long bilip bilong ol.

Tripela mun i go pinis Edai i joinim yut felosip. Wanpela de, taim RE tisa bilong ol i kam long givim RE lesan, tisa i askim ol sumatin: "**Husat inap long kam long fran na serim bilip bilong em long bungim Jisas?**"

Wantu tasol Edai i apim han bilong em. Olgeta klasmet bilong em i singaut na mekim bikpela nois...na tok no gut long Edai; "**Yu maus pas man..olsem wanem yu wokim testimoni?**"

Tasol Edai i no wari long ol. Em i sanap na kam long fron. Em i tok: "**Em i tru. Mi wanpela maus pas man. Tasol nau maus pas bilong mi i lus pinis. Long helpim bilong pren bilong mi Arua, mi joinim felosip bilong yut olgeta Sarere long haus lotu. Long dispela felosip, mi bin bungim Jisas na Jisas i senisim laip bilong mi. Bipo mi wanpela maus pas man. Tasol nau, yupela i lukim....mi inap long toktok wantaim yupela. Jisas i bin senisim laip bilong mi?**"

**I tru. Yumi bungim Jisas planti taim long toktok bilong em insait long Gutnius na long Sakramen bilong em. Tasol miting bilong yumi wantaim Jisas i save senisim laip bilong yumi o nogat?**

## Simbu Luteran bai selebretim 75 Yia jubili

### Paulus Tali i raitim

OL Luteran Kristen bilong Simbu i save lotu long Kamkumung long Lae Siti i lukluk nau long selebretim 75 jubili yia bilong Gutnius long Simbu.

Sios long Simbu i bin kirap long 12 Septemba 1934 na ol Kristen bilong Simbu long Lae Siti i laik amamasim de bilong sios long 12 Septemba 2015 long makim wokabaut bilong Gutnius bin go antap long Simbu.

Misinari konprens i bin kamap long Julai 10 na 11, 1934 long Lae na bihain ol misinari kam long Finsafen na ol go kamap long Ega long Simbu na bihain, ol i go long Hagen.

Misinari Bergmann em i namba wan misinari long kamap long Simbu.

Narapela misinari em George Vicedom husat i bin go long Hagen.

Long Septemba 1934, moa evanjelis na 4-pela misinari i bin go kamap long Onerunka long Kainantu Distrik na bihain, ol i kamap long Ega long Simbu.

Ol i bin bildim ol haus na stat long go aut autim Gutnius insait long Simbu.

Long dispela hatwok na wokabaut bilong Gutnius tasol na ol Luteran Kristen bilong Simbu i laik tingim ol hatwok bilong ol misinari husat i bin karim lotu i kam

long Simbu we nau i makim 75 yia.

Singaut i go long husat Simbu i stap long Lae siti long go bung wantaim ol na selebretim bikde bilong ol Kamkumung Luteran kongrikesen long Lae.



Ol Pasto i bin stap long Luteran Sios misineri konprens long Lae i redi long wokim lotu sevis bilong statim konprens. Foto: Paulus Tali

## Pre De i bringim helpim

### Tony Sapan i raitim

OL i tokim ol pipel i kamap long bung bilong makim Nesenel Pre De long Kunaye viles long Lahir Ailan olsem ol i laki long gat kantri ol i ken kolim ples bilong ol taim planti narapela pipel long wol i no gat kantri.

Jeneral Menesa bilong Lahir Maining Eria Len Ona Asosiesen, Dennis Gati i

mekim dispela toktok long wanpela lotu bilong makim Nesenel Pre De long Kunaye viles em Asembli ov God Sios (AOG) i bin go pas long en.

Mista Gati i autim tu tok amamas bilong Siaman bilong LMALA, James Laketan long wok ol sios i mekim long developmen bilong maining ailan bilong Lahir na ol pipel bilong en stat long taim ol i

sainim tok orait bilong Nesenel Pre De long 2007.

Tresera bilong Lahir Kaunsil bilong ol lotu, Pater Philip Chan i tok amamas long tupela praim minista bipo, Gran Sif Sir Michael Somare na Gavana bilong Nu Ailan Sir Julius Chan long kamapim gutpela wok politik na we kantri i ran gut.

Pater Chan i tok sapos dispela tupela lida i no bin

tingting gut na mekim samting kantri na ol pipel bilong en bai i no inap kism kain helpim ol i gat nau. Em i tok dispela i kamap bihainim plen long God bilong PNG.

Em i tokim ol pipel long dispela bung olsem Nesenel Pre De long 2016 bai i bikpela na gutpela i no long onaim ol lotu tasol long onaim nem bilong Jisas Kraus long go pas long developmen bilong kantri.

# Politiks i no inap bagarapim astingting bilong konstitusen



Long las wik Fraide, Suprim Kot bilong PNG i tokaut olsem ol senis Palamen i bin mekim long Seksen 142 na 145 bilong Konstitusen long 2012 na 2013, i no bihainim lo. Na Kot i rausim ol dispela foapela senis. Long taim ol jas i tokaut long disisen, ol i bin mekim sampela toktok we i soim olsem ol dispela senis i no bihainim tru astingting bilong ol dispela seksen bilong konstitusen.

Palamen i bin yusim namba bilong en long hariap tru na mekim ol dispela senis bihain tasol long O'Neill gavman i winim nesanel ileksen long 2012. As bilong tok em long stopim ol vot i no gat bilip long gavman.

Ol faivpela jas bilong suprim kot i bin tokaut long disisen bilong ol long dispela salens em Belden Namah, memba bilong Vanimo Grin na Ila Geno husat i bin holim wok bilong Sif Ombudsmen i bin bringim i go long kot.

Disisen bilong Suprim Kot i rausim ol dispela senis palamen i bin mekim: Seksen 145 we ol memba i mas givim wan mun notis long muvim vot i no gat bilip; apim namba bilong ol memba long 11 i go antap long 22 husat i sapatim dispela notis bilong vot; muvim taim we vot i no gat bilip i ken kamap long 18 mun i go antap long 30 mun; na Seksen 142 we i daunim namba bilong de palamen i ken bung long wanpela yia, long 63 de i kam daun long 40 de tasol.

Dispela disisen bilong Suprim Kot i wanpela bikpela win tru bilong ol pipel bilong PNG. Bikos em



i soim ples klia olsem Konstitusen o mama lo bilong kantri em i strong yet. Em soim ples klia olsem ol papa bilong yumi husat i bin raitim Konstitusen bilong PNG i putim gutpela sindaun bilong ol pipel i go pas long husat politikal pati i stap long gavman. Em i soim

ples klia tu olsem ol saveman bilong lo i no inap paulim nating pipel long taim Jastis sistem bilong kantri i independen na i strong yet. Bihain long Suprim Kot i tokaut long disisen bilong en, Praim Minista Peter O'Neill i tokaut olsem em i luksave na i soim rispek long

disisen bilong kot. Em i tok as bilong palamen i bin mekim ol dispela senis long 2012 na 2013 em long stopim ol vot i no gat bilip i kamap klostu klostu na long banisim wok mani bilong kantri. Em i tok sapos i no gat strongpela politikal lidasip bai ol ovasis investa i no inap kam wok bisnis long PNG.

Belden Namah i bin amamas long disisen bilong Suprim Kot na em i tok em i luksave olsem ol dispela senis palamen i bin mekim em long strongim tasol gavman bilong O'Neill long holim wok inap faivpela yia. Em i tok tu olsem dispela ol senis i bin rausim pawa bilong pipel na gavman tasol i bosim olgeta samting.

Olgeta pipel husat i harim disisen bilong Suprim Kot i amamas na i autim tingting bilong ol long wanem kain palamen yumi lukim long PNG tude, 40 bihain long independens bilong kantri. PNG i wok long senis na i gat moa mani i kam long ol mineral na oil na ol arapela bikpela bisnis. Tasol politiks bilong kantri i no senis na

kamapim gutpela stia bilong kantri. I gat bikpela salens i stap long dispela eria. Palamen i bin kamapim lo long stopim ol Memba bilong Palamen (MP) long kalap i go kam long ol politikal pati, tasol ol memba i wok long senisim pati yet. Ol i no kisim wanpela strong-

pela mekim save long taim ol i brukim dispela rul.

Long taim Suprim Kot i tokaut long disisen bilong en tu, Sip Jastis i mekim wanpela impoten toktok. Em i askim watpo na o han bilong gavman husat i holim wok bilong glasim konstitusen i no bin hariap long salensim ol kain senis olsem aninit long Seksen 19 bilong Konstitusen. Em i tok ol lain husat i bin raitim Konstitusen i no bin ting long taim bilong independens olsem wanpela gavman bai i nidim moa long 6-pela mun long stretim olgeta samting na stat long mekim wok bilong en.

Yes watpo na ol han bilong gavman i no bin salensim dispela disisen long taim palamen i bin sensim ol seksen bilong konstitusen? Bekim bilong dispela askim em bikos tude wok politiks i bosim olgeta samting. Ol lain i go pas long ol gavman dipatmen em ol politisen i makim ol, olsem na ol i tubel long mekim stret wok bilong ol. Ol i pret bikos sapos ol i salensim gavman bai ol i aut long wok. Minista i bos, bai em i makim nupela man o meri long kisim ples.

Bai yumi selebretim 40 yia bilong independens neks wik, tasol i luk olsem sampela bikpela salens i stap yet. Wok bilong ol lida na ol disisen bilong ol em i wanpela salens.

Ol i mekim ol disisen long gutpela bilong ol pipel o ol i mekim long strongim pawa bilong ol yet. Yumi hop bihain long 40 yia, bai ai bilong ol i op na tingting bilong ol bai i klia long luksave long stretpela pasin bilong sevim ol pipel.

## Korapsen i bikpela!

...40 yia Independens amamas no gat mining long liklik manmeri

STIL pasin i bikpela long Papua Niugini. Dispela pasin i no pasin tumbuna bilong Papua Niugini.

Long tude samting bilong yu i no samting bilong yu moa taim yu no putim ai long en.

Bipo long waitman lo i kam manmeri i stil i min em i mas dai o kisim bikpela mekim-save.

Tude manmeri i stil, laki lo i kisim em, em i kisim mekim-save. Nogat em i lap na go maski em bikpela o liklik stil,

Bipo taim yu stil dispela i bikpela sem, em i soim yu no man o meri tru, yu no inap long stap long strong bilong yu yet.

Tude manmeri i stil i no inap long sem long pasin bilong em.

Nau yumi olsem kantri bai amamasim 40 yia Independens bilong mipela.

Em i gutpela tasol askim em olsem manmeri i gat wanem samting i stap bai ol i amamas?

God Papa i blesim Papua Niugini long planti gutpela samting, na ol savemanmeri



bilong mipela yet na bilong ol narapela kantri i save tu olsem Papua Niugini i paradais.

Ating yumi ken tok em i olsem paradais we long Buk Baibel stori i tok long Adam na Eva, God i rausim tupela.

Ating Papua Niugini i kain paradais ples olsem taim ol savemanmeri i tok Papua Niugini i winim planti arapela kantri long graun long em i gat olgeta samting long bus, graun, wara, kaikai, aninit long graun na klinpela win em diwai i kamapim.

Em i tru taim yumi i tingim olgeta dispela ol gutpela samting.

Na dispela long sait bilong mani i mas min Papua Niugini manmeri mas gat gutpela sindaun.

Tasol nogat, sindaun bilong ol i nogut.

Bihain long 40 yia Independens maski gavman i tok em kamapim ol bikpela mani plen no gat gutpela kaikai bilong dispela ol mani plen. I luk olsem em ol tok win tasol.

Yumi gat ol rot i bagarap yet we long taim bilong Australia, dispela ol rot em ol kar i ken ran go kam tasol nau gras na bus i karamapim.

Ol haus sik i baragap na brukdaun, klasrum bilong ol skul i bagarap o nogat klasrum na ol skul i pas, ol sik we i mas pinis i kamap gen, wok didiman i no kamap strong, manmeri i no wok bisnis na manmeri no gat mani long poket bilong ol.

Taim kain sindaun i stap, wanpela i ken askim manmeri bai amamasim 40 yia Independens olsem wanem?

Ating mipela i ken tok dispela amamas i bilong ol manmeri husat i gat mani, husat i save kamapim lo, husat i lukautim mani na i save tilim mani bilong Papua Niugini.

Long 2012 ripot bilong

Trensperseni Intenesenel long hamas gutpela wok gavman bilong wanpela kantri i mekim Papua Niugini i kisim 25 mak we wanem kantri i mekim gutpela wok i kisim 100 mak.

Namel mak we Trensperseni Intenesenel i bilip we ol kantri i pait strong long korapsen em long 43. Tasol mak bilong Papua Niugini i stap daunbilo long 25.

Yunaited Nesen long makim kain gutpela sindaun ol manmeri i gat long em (Humen Developmen Indeks), namel long 187 kantri Papua Niugini i stap long 157.

Dispela i soim maski em i paradais, i gat olgeta gutpela samting, stat long 2002 i kam inap nau gavman i kamapim ol bikpela mani plen i no gat tupela senis.

I no gat gutpela senis long laip bilong ol manmeri bikos manmeri husat i mekim lo, husat i lukautim mani na husat i tilim mani i stil yet long ol manmeri bilong Papua Niugini.

Wantaim dispela mipela i ken tok amamas bilong 40 yia Independens i no gat mining long ol liklik manmeri.



Published Weekly, Thursday, for Word Publishing Company, Ltd.

P.O. Box 1982, Boroko, NCD  
Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00


General Manager  
Elizabeth Konga

Editor  
Veronica Hatutasi

Published at  
Able Building  
Complex,  
Sec 58 Lot 02,  
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# Em nau! Ol pikinini i ken painim rot i go long ples wantaim Wantok kru...



## Point ov Oda

KANAGE i em wanpela bisnis man na tu, em i memba bilong Palamen Haus, makim distrikt em kam long em. Wanpela kot i wok long kamap long Mosbi Nesenel Kot namel long bisnis bilong em na wanpela bignem benk insait long PNG.

Sem wik taim kot i wok long kamap, palamen siting tu i kamap. Kanage i stap long palamen long narapela tupela de na namba tri de, em i kamap long kot haus.

Em i sindaun arere long loya bilong em na harim ol toktok pait i wok long kamap namel long tupela loya: loya makim bisnis blong em na narapela loya makim benk.

Tok pait i go bikpela tru. Loya bilong benk i toktok i go na toktok bilong em ino go gut long yau bilong Minista Kanage. Toktok bilong loya i mekim na bel bilong minista Kanage i hat olgeta.

Boi! Kanage i pilim no gut na no gat toksave long loya bilong em, em i pairapim desk long han bilong em.

"BANG!!!" Tebol i pairap wantaim na Kanage i sanap singaut long Jas.."Point ov oda! Point ov Oda, Yor Hona..!!" Jas i tokim loya long toksave long klaen bilong em olsem dispela em i no Palamen Haus, em Kot Haus...



Side Kona Joe  
MB Hohola

## Deti gem stret

WANPELA taim, wanpela soka kompetisen ol pilai resis i kamap long Bulolo namel long ol Bulolo Forestry Koles na Wau Sekendari skul tim.

Planti ol manmeri i lukluk i stap wantaim ol sampela wait man. Tupela tim i no pilai gut olsem na wait man i kirap na tok olsem, "Ol lain pilai deti gem stret." Kanage i harim na em i kirap na i tok, "Tru ya, ol i no was was na ol i kam long pilai."

Marasin boi  
Wewak




### Ol wod lista hia:

- ADVAISA
- AIPAS
- BANARAS
- BALUS
- BAIM
- DABOLIM
- DASTAWE
- EKELESIA
- EKSESAIS
- FASBON
- GARAMUT
- GUTNEM
- HANPAUS
- HANGAMAP
- HAMBAMAN
- IKONOMI
- JENERETA
- KAGOBOI
- KIRAPIM
- LAIPSTORI
- MANGAL
- NAMELMAN
- OLAPUKPUK
- PAIRITRUM
- RAUNWARA

E Y R G R J O V Q F G R E E B G N I D E  
 D A S T A W E I M S V X I K L I H E A O  
 K C T T B N E N E H N F S O F O O S B U  
 H P V F K L B U E L A R Z C O P I L O E  
 E E N X C L O M M R M E T D N A R S L O  
 T P I J D D O H Q F E R O J V S H O I F  
 G B N V R B T I Q L L T L D U R A G M U  
 Z A S F N V A H H A M B A K M A N G S I  
 R L U S U E B I A A A Z P M A I G L T Q  
 G U T N E M A K M N N E U S X T A K N U  
 M S E C Y F N O W M P R K A F E M A O O  
 N K E H R G A N T N T A P E S K A G X F  
 N K I B I I R O S I Z U U E L S P O M N  
 R A I R S O A M R Z E N K S V E G B A E  
 O N S R K S S I N S F W G T T S S O N A  
 E Y A G A R A M U T V A H E A A M I G E  
 D S L A I P S T O R I R S P N I E E A V  
 B A N I M O I E N R O A I B C S V F L A  
 R Q E A R D S M K A E A O S O A E S E V  
 A E R N A N C A K F D O J J O N Y L J M

### Ansa bilong Wod Pilai isu 2138





# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)



Makira Banana Festival i soim ol kain banana.

## Draut i ken bagarapim ikonomi bilong PNG: Dr Mike

WANPELA mansave long wok egrikalsa long Australia na Melanesia i tok dispela draut o taim bilong bikipela san i wok long hamarim Papua New Guinea bai kamapim bikipela hevi long ikonomi bilong kantri na tu, ol pipel i save planim kaikai bilong salim.

Dokta Mike Bourke bilong Australian National University husat i gat planti save long wok egrikalsa long PNG i tok planti fama bai bungim bikipela hevi long kisim mani long wanem, ol bikipela san na kol i bagarapim ol gaden bilong ol.

Dokta Burke i tok tu olsem dispela taim nogut i bagarapim tu ol wok maining we i save bringim bikipela mani i go long ikonomi bilong kantri.

Em i tok dispela taim bilong bikipela san i kamapim bikipela wari long planti samting olsem, ikonomi, helt na edukesen long PNG.

Samting olsem 2 milien pipel long Papua New Guinea nau i kisim hevi long dispela draut.

## Korapsen sas long ol 16 Vanuatu MP i bikipela wari long kantri

KAIN we ol 16 gavman memba long Vanuatu palamen i stap long han bilong kot long ol briberi sas i ken rausim gavman na kamapim konstitusenel kraisis o hevi long kantri.

Kiery Manassah, wangepa politikal obseva na Pablik Rile-sens Opisa aninit long Joe Natuman gavman bipo na nau i stap long oposisen i tok.

Fainens Minista Willie Jimmy tasol i bin tokim pinis Suprim Kot olsem em i gilty long brukim Lidasip Koud Ekt.

Mista Manassah i tok em i no ting ol arapela memba 15

memba i save gut long bikipela hevi dispela keis bai bringim long ol yet na gavman.

Em i tok, kain we ol memba ia i stap yet long opisal wok bilong ol insait long gavman, dispela i ken kamapim hevi namel long judiseri na eksekutiv han bilong gavman.

Mista Manassah i tok i moabeta sapos Praim Minista Sato Kilman i rausim ol memba we i stap insait long han bilong kot na i kamapim nupela gavman wantaim ol lain long oposisen.

## Graun long Solomon em i laip bilong pipel: Lawrence Makili

WANPELA enviromen ektivis long Solomon Ailan i tokaut strong long gavman long no ken kisim nating graun bilong ol pipel long kantri long nem bilong divelopmen.

Lawrence Makili, wangepa enviromen ektivis bilong Solomon Ailan na tu, i memba bilong Indijinis Peoples Biodiversity Network i tok, graun long Solomon Ailans em i no wangepa samting nating - em i laip bilong ol pipel.

Em i tok wanem kain divelopmen i kamap long kantri i mas karamapim ol as ples pipel long graun bilong ol yet.

Mista Makili i mekim dispela toktok bihain long Nesenel Len Konprens we ol i holim long Honiara las wik long sait long len rifom long kantri.

Em i tok Solomon Ailan i no ken bihainim rot bilong Fiji, PNG na Vanuatu we ol asples pipel i lusim pinis planti graun bilong ol long ol divelopa long ol lis aninit long gavman polisi.

## Cairns bai makim tu namba 40 Independens Aniveseri

OL pipel bilong PNG na ol poro bilong ol long siti bilong Cairns long Kwinnslen bai makim tu namba 40 independens aniveseri bilong Papua Niugini.

Mary Hikimet, ogenaising komiti memba na brotkasta long Cairns Komyuniti malkaiserel redio i tok.

PNG ibin kisim independens long Australia long namba 16 Septemar long 1975 na kamap olsem wangepa kantri.

Ol pipel bilong PNG long olgeta kona long wol bai joinim ol pipel long PNG yet long makim dispela bikipela de long politikel histori bilong PNG i kamap olsem wangepa nesen.

Taim kantri i bin kisim independens, planti pipel long PNG na Australia tu i bin wari olsem nogut ol pipel i no bin redi gut long dispela independens, tasol kantri i stap orait maski sapos em i bungim sampela hevi long wok politik namel long 1975 na nau.

Narapela bikipela wari em kantri i wok long bungim nau em long korapasan we i no bin stap bipo long independens.

Tasol planti pipel i tok 40 yia em i bikplea samting na ol pipel i mas makim na amamas.

Mary Hikimet husat i kam long Manus provins na komiti memba na brotkasta bilong Cairns Komyuniti malkaiserel redio stesen. fm 89.1 na em i tok olsem ol pipel bilong Cairns bai makim gut dispela bikipela de.

Em i tok tripela bikipela grup bai kam long PNG long stap tu long ol selebresen long Cairns.

## Bogenvil i tingim ol pipel i lus long pait

STAT long last wik, ol pipel long Atonomas Rijon bilong Bogenvil i wok long tingim ol pipel bilong ol husat i bin lus long taim bilong Bogenvil



Bogenvil luksave long Missing Persons de.

Ol Poto: ABC

hevi na pait, na ol i no save yet long wanem samting i bin kamap long ol.

Wanpela seremoni long tingim ol missing person long Bougainville i bin kamap long las wik.

Moa long 20 tausen pipel bilong Bogenvile i bin dai insait long 10 yia pait wantaim Papua New Guinea - na ol i no save yet long wanem hap bodi blong sampela long ol i stap long en.

Menesa na ripota bilong New Dawn FM redio, Aloysius Laukai i tok narapela stori tu em long ol i painim 4-pela pipel blong Bogenvil husat i bin lus long solwara moa long tupela wik i go pinis long Federet Stets bilong Maikronesia.

Em i tok ol polis i toksave tu olsem ol bai salim go bek long Solomon Ailan tupela man husat i bin lus long solwara na ol i painim tupela long Fead Ailan we i klostu long Nu Ailan Provins.

## Makira Provins long Solomon i holim Banana Festival

NAMBA tu Banana Festival bilong Makira Ulawa Provins long Solomon Ailan ol ol i holim long Kirakira i bin pinis long Fraida las wik.

Sampela long ol moa long 100 kain banana ol i soim long Makira Banana Festival long Solomon Islands (

Ol i bin bin holim namba wan festival long mun Jun las yia bilong helpim na apim wok bilong turisim long provins.

Makira em i gat nem olsem em i gat moa long 100 kain banana, we i stap olsem bikipela samting tru long kaikai na kalsa bilong ol pipel long dispela provins.

Long festival, ol i soim ol kainkain banana we i stap na ol kainkain we ol i save redim na kukim banana.

Menesa bilong Solomon Ailan Kastom Gaden asosiesen, Clement Hadosaia i

stap long Kirakira long helpim ol pipel long luksave long ol gutpela samting banana i ken givim long sait long helt.

## Vanuatu Fainens Minista i tok em i gilty long brukim lidasip lo

FAINENS Minista bilong Vanuatu, Willie Jimmy i bin tokim Suprim Kot olsem em em i gilty long sas bilong em i brukim ZLidasop Koud o lo bilong kantri.

Tasol ol arapela 15 memba we i fesim tu wankain sas bihainim ol tok sut bilong briberi i tokim kot olsem ol i no gilty.

Dispela Leadership Code keis i hap bilong ol tokwin olsem ol wan wan memba ya i bin kisim gris manilong mak bilong \$10,000 long lida bilong Oposisen bipo, Moana Carcasses Kalosil.

Aninit long Lidasip Koud, Mista Jimmy i ken fpeim fain long manimak bilong 47 milien mani bilong Amerika, o go long kalabus inap long 10-pela yia.

Niusman long Port Vila, Hilaire Bule i tok ol 15 pela memba ya bai ol i kotim ol long Suprim Kot tat long dispela wik Mande.

Em i tok ol 15 pela memba ia i stap long sait long gavman, na 5 pela long ol i gavman minista.

## PNG gavman i rausim VC bilong UOG

PAPUA New Guinea gavman i rausim pastaim Dokta Gairo Onagi na algeta ol memba blong Yunivesiti bilong Goroka Kaunsel.

Joseph Sukwianomb, Asisten Sif Seketeri blong PNG gavman i tok Gavman i rausim pastaim Vais Sansela bilong Yunivesiti ov Goroka, Dokta Gairo Onagi bihainim ol bikipela trabal wantaim ol sumatin long

UOG long wik i go pinis.

Minista bilong Haia Edukesen, Malakai Tabar i bin tokaut long dispela tingting bilong gavman na em i tokaut tu olsem o li rausim Yunivrsiti Kaunsell.

Tupela sumatin i bin kisim bikipela bagarap long trabal i bin kamap taim ol i bin pait wantim ol polis long Goroka taun.

Polis i bin pulim kalabusim tu sampela sumatin na ol i stap yet long kalabus.

Mista Sukwianomb i bin go wantaim Minista Tabar long bungim ol polis, ol sumatin, ol papa graun na Isten Hailans Gavana, Julie Soso.

## Kenneth Natapei i feveret long senisim papa long Vanuatu bai ileksen

PIKININI man bilong Oposisen lida bilong Vanuatu husat i bin dai pinis long mun Julai, i gat gutpela sans long senisim papa bilong en olsem memba blong Port Vila long palamen.

Vanua'aku Pati i toksave aste olsem em i makim Kenneth Natapei, pikinini man bilong leit memba bilong Port Vila long Vanuatu Palamen, Edward Natapei olsem kandidat bilong ol long bie ileksen long mun bihain.

Niusman long Port Vila, Hilaire Bule i tok maski Kenneth Natapei i no gat ekspiriens long wok politik, lukluk we i stap nau ia i olsem em i ken win long bai ileksen.

Em i tok Nagriamel Muvmen we i gat tripela memba long palamen tu i tokaut pinis olsem ol i sapotim Kenneth Natapei.

Hilaire i tok dispela em long wanem papa blong en i popula memba na tu i gat wangepa tredisen long Vanuatu tu long pipel i sapotim pikinini bilong memba husat i bin dai.



**REFUJI MAMA NA PIKININI :** Dispela mama wantaim bebi bilong em i bilong ol lain pipel ol i kolim ol "Kurds", ol mainoriti grup ol i save kisim taim no gut ol gut long ol kantri ol i stap long en long Afgha-nistan na ol narapela Midel Is kantri.

Nau ol i ronawe long wo we ol Islamik Stets (IS) teroris i kamapim long Syria, long painim seif ples long Yurop na ol kantri olsem Austria, Jemani na ol arapela moa. Austria na Jemeni i opim ol boda bilong ol long planti tausen refuji bilong Syria i go insait .

Long wankain taim, gavman bilong Australia i kisim askim long helpim ol refuji bilong Syria, moa yet, bihain ol i lukim ol piksa bilong liklik bebi Kurd, Aylan Kurdi, i dai na go sua long nambis taim ol i ranawe long pait long kantri Syria.

Ol ripot i tok Praim Minista bilong Australia, Tony Abbott i tok Australia inap kisim moa refuji pipel i kam long bot.

Stat yet long 2011, ol birua i kilim moa long 240,000 pipel long Syria na planti milien i kamap ol refuji no gat ples bilong stap.

**MOA REFUJI LONG YUROP:** Ol refuji bilong Syria i kamap long Kos Ailan, long kantri Greece long wanpela dingi bihain long ol i kalapim Aegean Si i kam long Turkey.

Ol Yuropien Yunien (EU) kantri i painim hevi nau taim planti moa refuji bilong Syria na ol narapela i pulap long ol kantri (28) bilong ol.

EU boda ejensi, Frontex i tok las mun, Yurop i lukim rekot namba long 107,500 refuji i kamap long rijon.

Ripot i tok EU i tok oraitim 2.4 bilien euros (\$6.7 bilien) long helpim ol memba stet i helpim ol refuji i wok long kapsait i go long ol EU memba kantri.



**POLIS HOLIM PASIM EDUARDO OVIEDO:**

Dispela wik i lukim polis i holim pasim wanpela man Argentina long lokim meri na pikinini insait long haus olsem ol kalabus long planti yia. Dispela em stori long pasin bilong mekim man nogut na pret.

Kot i harim olsem man ya i fosim pikinini long kaikaim kaikai bilong dok na pulim win bilong ges. Insait long kes ol i wokim long plang, brik na metol ba, ol beg i gat pekpek bilong man i stap, kaikai bilong dog, ol sut

marasin nidel, ges ken, ol lok, sen na rop we man i save taitim tupela long en.

Saspek Eduardo Oviedo i gat 66 krismas na em i wanpela konstraksen wokman.

Meri bilong em i gat 61 krismas na pikinini i gat 32 krismas.

Ol bai sasim em long kidnepim na wokim pasin i no stret long famili bilong em.

Sapos kot i painim em gilti, em bai kalabus long 15 yia.



**GUTPELA STORI LONG MUVI EKTA MARITIM FAMA:**

WANPELA naispela stori we muvi ekta bilong Amerika, Maud Jeffries na soldia fama bilong Australia, James Osborne we marit bilong ol long 1904 i bin kamapim bikpela nius long ol niuspepa. Em i wanpela gutpela stori we dispela biknem ekta moa long 100 krismas i go pinis, i bin lusim gutpela wok bilong em long maritim wanpela fama bilong Australia.

Long leit 1890s, Mis Jeffries i bin wanpela bikpela pes long muvi wol na nem na pes bilong em i bin kamap bikpela long muvi ol i kolim long, The Sign of the Cross. James Bunbury Nott i bin memba bilong Australian

lait hos long Boer Wo.

Wanpela bubu bilong em, Ingrid Osborne, i tok Osborne i bin mangalim stret pes bilong ektres Maud na em i bin go joinim muvi kamapani long lukim em na stap klostu long em, na maritim em.

Mis Jeffries na Lutenen Osborne i bin marit long Nu Silan long yia 1904 taim ol i stap long muvi raun, na ol niuspepa i bin raitim planti stori long ol.

Bihain long em i kamap Misis Osborne, Maud i lusim wok olsem muvi ekta olgeta na tupela i go sindaun long Bowlylie, em wanpela bikpela sipsip fam long Gundaroo, not long Canberra.



**TINGIM TUPELA BUBU:** Ingrid Osborne em wanpela bubu bilong Maud na James i stap yet long Bowlylie propeti na lukautim fam na ol sipsip na kau. Bubus Maud i bin dai long 1946 taim Ingrid i gat 6-pela krismas.

**Ol Stori na Potol i kam long ABC, ABC courtesy bilong AFP na Reuters**

**"KULA MASAWA" CELEBRATE INDEPENDENCE THE ISLAND WAY!**

VENUE AND DATE:  
**KITAVA** — 15<sup>th</sup> September, 2015  
**KIRIWINA** — 16<sup>th</sup> September, 2015  
 Trobriand Islands, Milne Bay Province

**Kuma bi talosa!**

LSA-POM FOR AS LOW AS **K550.98\*** ONE WAY  
 K1,058.80 Return

POM-LSA FOR AS LOW AS **K633.00\*** ONE WAY  
 K1,058.80\* Return

An initiative of the Kiriwina-Good Enough Electorate. LinkPNG supporting our local economy!  
 \*Tax inclusive/Terms & Conditions apply

Reservations - Toll Free: 1805465 Email: sales.linkpng@airniugini.com.pg Find us on Facebook: www.facebook.com/linkpng

# BAT Sapotim SME



Kodineta bilong samit, Gloria Sevua, NDBI CEO, Des Yaninen wantaim BAT Kopret Afeas Menesa, Albert Veratau na BAT Ekstenel Afeas Menesa David Towe.

## Stanley Nondol i raitim

**British American Tobacco (BAT) i wok bisnis moa long 50 yia long kantri na i save long rot bilong helpim ol yangpela long mekim ol liklik bisnis.**

Dispela tingting i kamap ples kliat taim BAT i givim K50,000 long Nesenel Developmen Benk long holim wangepela samit bilong yangpela long kisim ol trening na skul long rot bilong statim liklik bisnis.

Sef Eksektiv Opisa bilong NDB invesmen Desmon Yaninen i tok namba bilong ol yangpela i kam aut long skul long gret, 10, 12 na ol teseri skul em bikpela na NDB i laik sapotim ol long statim liklik bisnis long sapotim ol yet long bihain taim.

Mista Yaninen i tok Entrepreneurial Youth Summit bilong yangpela bai kamap

long Pot Mosbi na em i namba wan samting benk i traime. Na dispela program bai kamap long olgeta provins long givim trening long ol yangpela long statim ol liklik bisnis.

Em i tok em i hat long ol yangpela i kisim dinau long ol komesel benk na statim liklik bisnis bikos ol komesel benk i save askim long sekyuriti na statim mani. Planti yangpela i no save gat dispela sekyuriti na statim mani na ol i painim hat lon kisim dianu long ol benk.

Mista Yaninen i tok aninit long dispela program bai lukim taim ol yangpela i pinisim trening bilong ol bai NDB i helpim ol long kisim dianu long benk na statim liklik bisnis.

Em i tok moa olsem aninit long dispela program ol yangpela bai no inap nidim sekyuriti o statim mani. Ol bai

kisim dinau long benk namel long K5000 na K100, 000. Na ol bai bekim insait long tupela yia wantaim winmani long 6.5 pesen.

Kopret Afeas Menesa bilong BAT Albert Veratau i go pas long sapotim wok bilong gavman long SME bisnis. Long 2013 BAT i sapotim NDB SME samit wantaim K100, 000. Na long 2014 i sapotim MSG miting wantaim K150, 000.

Mista Veratau i tok BAT i mekim bisnis long kantri long 50 yia na i save long wok bilong sapotim SME na lukluk long sapotim moa wok bilong gavman long sapotim ol liklik pipel long kantri.

Long wanakain taim Mista Veratau i tok ol pipel bilong PNG i mas lukaut long ol giaman prodak bilong ausait olsem giaman simuk i kam insait long maket bilong PNG.

# MRDC kisim Hilton hotel i kam long kantri

## Stanley Nondol i raitim

**MINEREL** Developmen Risos Kampani (MRDC) bai kisim wangepela nambawan bren bilong hotel long wol, Hilton Hotel na Risot i kam long Papua Niugini.

Menesmen bilong MRDC na Hilton i sainim agrimen las mun long kirapim konstraksen bilong 5 sta hotel na 15 stori wantaim 212 rum long Hohola, Pot Mosbi.

Hilton Pot Mosbi em hap bilong MRDC bisnis han na em i wangepela nupela divelpomen projek bilong Star Maunten Plaza we Praim Minista Peter O'Neill i opim las wik long Pot Mosbi.

Dispela Hilton Hotel bai i gat 4-pela resturen tupela ba, wangepela bisnis senta, helt klap wantaim autdo pul na bikpela spes.

Aninit long agrimen Hilton kampani bai menesim Hilton Hotel na konsensenta senta insait long

Star Maunten Plaza.

Menesing Dairekta bilong MRDC Augustine Mano i tok wok bilong sanapim dispela Hilton Hotel bai pinis insait long tripela yia long bungim APEC miting long 2018 long Pot Mosbi.

Mista Manu i tok long pinis bilong 2015, faundesen wok bilong 4-level Kutubu konsensenta senta na residensel lawa bilong 160 apatmen bai pinis.

Hilton bai divelopim planti komesel, ritel, na opis spes bihain long 2018 APEC miting na dispela em bai wankain olsem narapela hotel.

Mista Mani i tok ol bisnis na kampani bilong PNG papagraun i no bin kamapim dispela projek bipo na em i namba wantaim long Star Maunten Plaza na MRDC i kirapim long soim kantri na wol olsem ol PNG kampani ken mekim bikpela wol klas bisnis.

Mista Mano i tok tenkyu long hatwok, taim na rios

bilong ol papagraun kampani i olsem Star Maunten Plaza, Minerel Risos Star Maunten, Minerel Risos Ok Tedi na Petroleum Risos Kutubu long olgeta hatwok bilong ol.

Em i tokim ol papagraun bilong Ok Tedi na Flai Riva olsem dispela projek em narapela Ok Tedi Maining.

Mista Mano i tok moa olsem bihain long 40- yia dispela kain projek bai senisim tingting bilong ol papagraun olsem ol i no lain bilong kisim takis o rent long graun tasol ol tu i kamap divelopa nau.

Em i tok dispela projek tu bai helpim ol pipel bilong Papua Niugini.

Praim Minista Peter O'Neill, Gavana bilong Westen Ati Wobiro, Gavana bilong Sauten Hailens William Powi ol menesmen bilong Hilton na ol gavman minista na ol arapela bikman nameri i kamap long graun breking seremoni long las wik.

# Nupela bris long Kimbe klostu pinis



**Ol wokman wantaim helpim bilong kontrakta Curtain Consort, Consot Siping, Pacific Towing Port Service na Nalobu i lukim ol i traime dispela nupela Kimbe bris long las wik Fraide wantaim sip MV Papua Coastal..**

PNG Ports Koporesen (PNG-PCL) i tokaut olsem nupela bris bilong ol sip long kimbe em klostu i pinis na bai op long pablik bihain long sampela liklik wok i pinis.

PNGPCL i tok ol wok long straksa bilong bris i pinis na lukim 89 pesen bilong olgeta wok i pinis na klostu taim bai i op.

Sif Eksektiv Opisa (CEO) bilong PNGPCL Stanley Alphonse i tok planti wok i pinis na bihain long ol opim, kon-

trakta Curtain Bros bai givim bris i go long menesmen bilong Kimbe bris na pablik bai stat long yusim.

Mista Alphonse i tok PNGPCL i amamas long kirapim dispela bris long ol stekholda, bisnis na ol pipel bilong Wes Nu Briten provins bai kisim ol sevis.

Mista Alphonse i bin tok olsem ol bris olsem Kimbe, na ol bris long ol arapela provins i no save mekim winmani bilong kampani tasol PNGPCL

bai go het na stretim ol na ol pipel bai kisim sevis.

Ol bris mekim mani bilong kampani em Pot Mosbi, Lae na Rabaul. Ol arapela em PNGPCL i stertim long ol pipel bai kisim sevis.

Long dispela projek i lukim ol kontrakta i rausim olpela bris na putim nupela bris.

Dispela projek inap long pinis long mun Julai tasol ol wok i no pinis hariap bikos long ren na olgeta wok bai pinis long dispela mun, Septemba.



Dispela poto i soim Hilton Hotel bai sanap long Hohola, Pot Mosbi.

# BSP tokaut long dividen bilong Oktoba 2015

**BIKPELA** komesel benk long kantri, Benk Saut Pasifik (BSP) i tokaut long dividen bilong we kampani bai baim long ol seaholda long Oktoba 2015.

Siaman bilong BSP, Sir Kostas Constantinou i tok bot bilong BSP long las wik i tok orait long interim 2015 Fainensel Stetmen long 6-pela mun i go bek long pinis bilong Jun 2015 we win mani o profit bin sanap long K266.9 milien.

Em i tok dispela i winim profit bilong 2014 na i go antap long 1.7 pesen.

Sir Kostas itok interim dividen long 22.5 toea long wawan sea i makim: Gros interim dividen klostu long K105 milien (K93 milien long 2014); Interim mani bilong main ol seaholda em long resio 39 pesen (35 pesen long 2014); Enuel mani kampani i baim em K7.40 sea prais long 10.6 pesen i wankain long 2014;

Taim bilong dividen em: Oktoba 5, 2015, na pemen bai go long ols eaholda long Oktoba 23, 2015.

Sir Kostas i tok benk i gat bikpela luksave long ol seaholda bilong kampani na em bai baim ol winmani we kampani i mekim.

Em i tok benk i gat bikpela wok long mekim long baim ol sea holda wantaim man i kampani i mekim long wawan yia.



# Vais Presiden blong MCC Grup Bungim ol PNG Gavman Minista



MCC Grup delegesin wantaim Envairomen Minista John Pundari

**WANPELA strongpela tim bilong China Metallurgical Group Corporation (MCC Grup) long dispela wik Mande na Tunde i bungim ol PNG Gavman minister long Mosbi long toktok long Ramu NiCo Projek.**

MCC Grup em bikpela fainensia o kampani we i givim moa mani long kirapim Ramu Nikel Projek long Madang provins.

Vais Presiden bilong MCC Grup, Xiao Xuewen na Siaman bilong Ramu NiCo Menesmen, Zong Shaoxing i bin bungim na miting wantaim tripela gavman minister long Mosbi taim ol i kam long kantri.

Dispela tim bilong MCC Grup i bin miting wantaim Maining Minista, Byron Chan, Envairomen Minista, John Pundari na Trensport na Infrastraksa Minista, William Duma long Septemba 6 na 7, 2015.

Ol bikpela toktok long miting bilong MCC Grup Vais Presiden Mista Xiao na Ramu NiCo Siaman, Misa

Zong i lukim long eria bilong wok bung namel long Gavman bilong PNG na MCC Grup long gutpela ron na stap blong Ramu NiCo Projek insait long PNG.

Ol toktok tu i pas long wanem ol gutpela rot i stap long helpim Ramu Projek we i ken lukim MCC Grup i kisim kaikai o win-mani long invesmen bilong en long PNG.

Mista Xiao i tok MCC Grup i bin givim bel na i sapotim gut stret Ramu NiCo Projek olgeta wan wan yia stat long taim kontraksen i bin stap 10-pela yia i go pinis. Tasol inap nau yet MCC Grup i no kisim gutpela win-mani i kam long invesmen bilong en long Ramu NiCo Projek.

Mista Xiao i tok olsem nau long dispela taim prais bilong metal long wok i pundaun i go daunbilo tru na planti ol maining kampani long wok i wok long pasim wok. Olsem na i gat bilip olsem Ramu NiCo Projek bai wokim bikpela loss long pinis bilong dispela yia 2015.

PNG tu long nau yet i bungim bikpela hevi long sait long daunbilo prais bilong metal na ol maining kampani long kantri tu i rausim ol wokman bilong ol long sevim kos.

Tasol Mista Xiao i tok olsem sapos Ramu NiCo i no laik rausim ol nesanel wok lain bilong en, ol i mas wok klostu wantaim PNG gavman long lukluk long sampela kain rot long lukim developmen wok i go het na Projek tu i no ken bungim hevi na i ken stap yet.

Maining Minista, Mista Chan i tok olsem opis bilong em wantaim Mineral Risoses Atoriti bai mekim olgeta samting long toktok wantaim Ramu NiCo long lukim olsem Projek i go orait.

Envairomen Minista, Mista Pundari long miting bilong em wantaim Vais Presiden bilong MCC Grup i tokaut olsem dipatmen bilong em bai go het long helpim na sapotim Ramu NiCo Projek long wanem eria ol i nidim

long stap yet.

Mista Pundari i tok tu olsem ekonomik wok-bung na rilesins namel long PNG na China i go long go strong na em i welkam long MCC long lukluk tu long ol arapela invesmen insait long PNG.

Trensport Minista, Mista Duma tu i autim tingting bilong em olsem dipatmen bilong em bai go het long sapotim ol invesmen bilong MCC Grup long PNG.

Mista Duma i tok em i gat tingting olsem MCC Grup mas lukluk tu long helpim PNG long sait long invesmen long wokim rot na bris long sait long infrastraksa developmen long kantri.

Namba wan Siameri bilong Ramu NiCo, Madam Luo Shu tu i bin kam wantaim dispela bikpela deligesin bilong MCC Grup, long lukluk raun bilong ol i go long Madang we ol i go lukim KBK Main long Usino-Bundi distrik na Basamuk Rifaineri long Raikos distrik long Madang provins.



MCC Grup Vais Presiden Xiao wantaim Maining Minista, Byron Chan



MCC Grup Vais Presiden Xiao wantaim Trensport Minista, William Duma



**Ramu NiCo Management (MCC) Ltd,**  
the manager of Ramu NiCo Project is proud to host the 5th  
**NATIONAL MINING EMERGENCY RESPONSE CHALLENGE**  
in Madang

Date: August 22-25, 2015  
Venue: DWU & PNG Maritime College



# Palau, Nauru sainim ea sevis agrimen



## Aja Potabe i raitim

**TUPELA Pasifik Ailan kantri i sainim wanpela ea sevis agrimen long Pot Mosbi long Mandé.**

Presiden bilong Palau, Tommy Remengesau Jr na Presiden bilong Nauru, Baron Divavesi Waqa i sainim ea sevis agrimen long

larim Nauru Aelain i flai i go i kam namel long tupela kantri.

Presiden Remengesau Jr i tok tude tupela kantri i no gat wanpela ae sevis agrimen long larim balus i flai i go long Palau na Nauru.

"Mi amamas long sainim dispela agrimen. Ol pipel bilong tupela kantri bai kisim gutpela helpim long dispela

sevis," Presiden Waqa i tok.

Ol pipel long dispela tupela kantri i save yusim bot long i go kam bikosol i no gat wanpela ea sevis agrimen namel long tupela.

"Tasol nau laip bilong ol pipel bilong tupela kantri bai isi taim Nauru Eelain i flai go kam long Palau," Presiden Remengesau Jr i tok.

# Las balus bilong rurel Madang i lus

## JAMES G. KILA i raitim

**GAVANA** bilong Madang, Jim Kas long Tunde i salim bikpela tok sori bilong em i go long balus kampani, Islands Airways long lusim wanpela na laspela balus bilong en taim dispela balus i pundan long rurel Kombakor ples-balus long Gama LLG long Usino Bundi distrik long Madang.

Mista Kas i salim tok sori bilong em i go long papa bilong Islands Aviesin, John Chung, long dispela wanpela las balus we i save helpim ol rurel pipel long Madang provins long planti yia.

Gavana Kas i tok, Islands Airways em i wanpela lokal balus kampani tasol long Madang, we i save helpim ol bus o rurel ples long Madang olsem Simbai, Raikos na ol liklik ples-balus long provins.

Dispela balus kampani save helpim ol rurel skul long distrik long bringim ol

saplai i go long ples we we no gat rot i go long en. Em i save helpim tu ol rurel famas long karim kopi beg bilong ol i go salim long taun.

Long nau yet ol Simbai pipel na ol rurel distrik olsem Raikos i stap wantaim bikpela wari na sori tru bikos dispela wanpela balus we i save helpim ol i bungim birua.

Gavana Kas i tok bikpela tingting bilong em nau em long provinsal kabinet long Madang i mas tingting nau long kisim wanpela balus long helpim ol rurel pipel long ol distrik we i no gat rot.

Wanpela long-taim pailot bilong Islands Airways, Kepten Gerard na wanpela pasindia i bin kisim bagarap taim dispela las balus i bin karim siaman bilong Kombakor praimer skul, Pastor Robinson Davi na het tisa bilong skul Max Mapai wantaim skul matiriel i go.

Insait long ripot Wantok i

kisim Pastor Davi i tok balus i lusim Madang ples balus long 11:30 long Mandé moning na flai i go olsem long Simbai maunten.

Em i tok ol i go daun orait tasol taim balus i putim ol wil bilong en long ples balus ol i pilim strongpela win i sakim balus i go aut long sait bilong ples balus olsem 10 mita.

Davi i tok em i guria taim balus i kalap kalap na i no long taim balus i kapsait na ol wil bilong balus i kirap na ol i slip long baksait insait long balus.

Davi i tok, em i strong na painim rot bilong em na brukim glas bilong balus na go outsait. Bihain em i pulim pailot wantaim Mapai i go aut.

Ol lain opisa bilong Gavana Jim Kas i bin helpim long bringim ol dispela tripela lain i go long Modilon haus sik long taun long kisim medikol tritmen bihain long dispela birua.

# Senis bai kamap long ol polis bos

KOMISINA bilong polis, Gari Baki, i tok i gat senis long ol senia polis bai kamap long 31 Oktoba. Em i tok tu olsem em bai no inap senis gen long trense lista em i bin wokim.

Komisina Baki i bihainim askim bilong ol pipel long 6 mail long Pot Mosbi na i mekim dispela toktok.

Ol pipel long 6 mail i bin askim em olsem, "Yu mas tingting gen long disisen bilong yu long rausim Supaintenden Andy Bawa long Nesenel Kapital Distrik (NCD)."

Komisina Baki i tok, "Disisen bilong transferim Suprintenden Bawa em i disisen bilong ol polis long top menesmen i mekim aninit long konstabuleri."

"Ol opisa i kisim promosen na ol i trense i go aut olsem

ol i gat bel hangre long en. Tasol, ol i mas mekim wok gut long nupela wok bilong ol olsem konstabuleri i laikim long en," Baki i tok.

"Mi no laikim ol opisa i kam aut long midia planti taim, tasol komanda husat i ken toktok long lo na oda problem mekim sampela gutpela komand na kontrol long ol manmeri aninit long ol."

"Polis brutaliti, no gat gutpela polis sevis, korap pasin bilong ol polis man na meri na no gat disiplin bilong ol polis i kamap nomal long kantri."

"Mi stap man nating long 4-pela yia i go pinis na mi save long wanem samting ol komyuniti i pilim long sait bilong polis sevis we konstabuleri i givim. Sevis bilong polis i no bungim mak we ol pipel tingim long en.

"Ol pipel long 6 mail i mas save olsem yangpela profesenel polis opisa Andy i mas kisim moa strong outsait long NCD long mekim em long kisim moa promosen."

"Komisina i gat pawa long olgeta narapela ol opisa na wanem kain oda komisina i givim em ol i mas bihainim."

Komisina Baki i laikim ol nius lain long ripot gut bikos asde ripot i stap long wanpela niupepa bai kamapim birua insait long polis.

"Yupela i no ken rait long wanem samting ol polisman i toktok, tasol yupela i mas rait long wanem samting ol i mekim. Yupela i mas rait long stretpela wei long ol polis i ken stap bung na wok wantaim. Dispela em salens bilong mi i go long ol midia," Komisina Baki i tok.

# 100,000 pipel long Madang bungim hevi bilong drai sisen



**Ekting asisten dairekta bilong Madang Disasta na Imejensi opis, Rudolf Mongalee wantaim ol opisa kisim ripot long drai sisen long rurel ples long Madang.**

## JAMES G. KILA i raitim

**WANPELA** Nesenel Draut tim bilong gavman long las wik i bin go long Madang long sekim na mekim ripot bilong ol bagarap I kamap bihainim longpela taim bilong strongpela san long provins.

Ekting asisten dairekta bilong Madang Disasta na Imejensi opis, Rudolf Mongalee i tokaut dispela wik olsem moa long 100,000 manmeri insait long 6-pela distrik long Madang provins i bungim bikpela hevi tru long dispela longpela drai sisen na ples i drai stret na ol bagarap na ol gaden kaikai i drai na wara i sot tru.

Ekting Asisten Dairekta bilong Madang Disasta na Imejensi opis, Rudolf Mon-

galee i tokaut long dispela bihain long wokabaut bilong Nesenel Draut Komiti i go long Madang.

Dispela Nesenel Draut Komiti i bin go long Madang provins long Sande na flai long balus na sekim ol ples insait long Madang provins we longpela taim bilong san i mekim olgeta hap i drai.

Mista Mongalee i tok bikpela hevi bilong ples i drai na ol pipel i sot tru long wara em ol ailan bilong Madang provins.

Komiti i bin go long Long Ailan long Sande na sekim ples na i lukim olsem Long Ailan i kisim bikpela bagarap tru long dispela longpela taim bilong san na ol pipel long ailan i nidim stret helpim.

Dispela komiti i flai long

helikopta i go olsem tu long Bagabag Ailan na sekim sampela ol eria long Karkar Ailan na i lukim olsem planti ples i drai stret na ol manmeri i kisim hat taim tru long painim wara long dring na kukim kaikai.

Mista Mongalee i tok planti ol bikpela wara na ol baret wara i drai olgeta.

Em i tokaut tu olsem ol welo hul wara long graun tu i drai na komiti i kisim ol ripot pinis long ol dispela hevi.

Nesenel Draut Komiti i bin go olsem long Bogia distrik we ol i lukluk long ol Manam ke senta we ples i drai olgeta. Ol pipel long ol Manam ke senta i kisim hatpela taim tru bikos ol banana ol i save kaikai i drai na i no karim kaikai.



# Roosters i stap long top

**SYDNEY Roosters i stap namba wan long Nesanel Rugby Lig (NRL) lata taim ol wankain tim husat i go long final long las yia i salens gen long premiasip bilong dispela yia.**

Kosa bilong Roosters, Trent Robinson, apim nem bilong ol Roosters na i tok olsem, "Ol pilaia bilong mi i pilai strong na setim rekot long raun 26 resis bilong dispela yia.

Sapos ol Roosters i win

tasol i go long fainal na i kisim primiasip em ol bai winim 15 raun bilong pilai, tasol ol Broncos i stap long baksait i winim planti pilai na i stap long mak bilong winim primiasip.

Planti pilaia bilong Roosters i kisim bagarap olsem Jared Waerea-Hargreaves, husat i kisim bagarap long skru bilong em, tasol ol i strong yet.

Olgeta tim i pilai strong long daunim Roosters.



Poto i makim ol 8-pela tim husat i stap long top-8 long Nesanel Ragbi Lig (NRL) fainal long dispela yia resis. Lata bilong ol top-8 tim;

- 1 Sydney Roosters
- 2 Brisbane Broncos
- 3 North Queensland Cowboys
- 4 Melbourne Storms
- 5 Canterbury Bulldogs
- 6 Cronulla Sharks
- 7 South Sydney Rabbitohs
- 8 St George Illawarra Dragons

# Bennett i amamas long tim bilong em

**BRISBANE Broncos i stap namba tu ples long lata na kosa bilong ol, Wayne Bennett, i go bek long ples bilong em long Brisbane wantaim amamas bikos ol i mekim gut tru long las wiken.**

"Ol Broncos i bin pinisim namba 8 ples long las yia, 2014 fainal na nau ol i pinisim long namba tu ples em i bikipels samting tumas," Bennett i tok.

Ol yangpela pilaia olsem Hunt na Milford i kam joinim tim Brisbane na i apim nem

bilong tim gut tru.

Brisbane i wari liklik long ol i lus long las resis pilai bilong ol 15-8 we Melbourne i winim ol, tasol nau ol i kisim moa strong wantaim Hunt, Alex Glenn na Jordan Kahu long go long kwalifaing fainal egensim ol Cowboys husat i stap namba 3 ples long lata.

Melbourne Storm i stap long namba 4 ples long lata bikos namba wan pilai bilong ol, Cooper Cronk, i soim sampela kala bilong em na ol win bilong Storms i kamap.

Tim husat i stap long namba 5 ples em i Canterbury Bulldogs wantaim Cronulla Sharks i stap long namba 6 ples.

South Sydney Rabbitohs i stap namba 7 ples na St George Illawarra Dragons i stap namba 8 ples.

Dragons i pilai strong tru na i daunim ol Wests Tigers long go insait long top 8, tasol ol sapota bilong ol i gat planti tingting olsem ol bai mekim gut long ol pilai i stap yet o nogat.

# Cowboys i daunim Titans 42-12 long Townsville



**NORTH Queensland Cowboys i kisim planti strong long go insait long NRL fainal taim em i daunim ol Gold Coast 42-12 long asples bilong ol Townsville.**

Ol Cowboys i stat isi na stap yet long baksait 12-0, tasol ol i skruim skoa bilong ol isi kam antap na abrusim ol Titans.

Cowboys i daunim ol Titans wantaim 30 poin, tasol ol i popaia long 6-pela kik bilong ol we skipa bilong ol Jonathan Thurston, Kyle

Feldt na Ethan Lowe i no bin putim go insait.

Ol Titans i go pas wantaim 12 poin long namba wan hap, tasol ol Cowboys i no bin putim wangepa spes na i lokim ol gut tru na Titans i lus wantaim 12 poin.

Ol Cowboys i stap namba 3 long lata bihain long ol i daunim ol Titans na namba wan pilai bilong ol, James Tamou na Michael Morgan, i bin kisim bagarap, tasol tupela bai kam bek yet long fainal.

Ol Cowboys bai kam bek

wantaim olgeta strong bilong ol long go insait long namba 5 wining fainal bilong ol, sapos Morgan i soim olgeta kala bilong em.

Narapela gutpela samting bilong ol Cowboys bai win em i olsem, ol i gat tupela fainal pilai i stap yet we ol bai pilai long asples bilong ol long Townsville.

Ol pilaia i bin kisim bagarap bai pasim sans bilong ol long win, tasol ol i gat wankain pilaia olsem tupela so ol bai go insait long fainal.

# Bulldogs i daunim ol Warriors 26-22



**CANTERBURY Bulldogs i daunim ol Nu Silan Warriors long Olimpik pilai graun long las wik Sande.**

Bulldogs i go pas wantaim 8-6 long namba wan hap bilong pilai tasol Solomon Kata bilong ol Warriors i bin putim wangepa trai na i bin kisim ples bilong ol Bulldogs.

Kik bilong Warriors i no go

insait na ol i stap pas we skoa i sanap olsem 10-8.

Tasol, ol Warriors i stap pas insait long 12 minit na Chase Stanley i putim wangepa trai bilong ol Bulldogs.

Long 61 minit ol Bulldogs i skruim skoa bilong ol i go antap moa yet na stap pas wantaim 20-10.

Taim 10-pela minit i stap yet

long bungim pinis bilong pilai, ol Warriors i bin putim tupela trai na karim skoa bilong ol i kam antap long 22, tasol ol Bulldogs i skruim poin i go antap long las minit na i bin kamap wina wantaim 26 poin.

Roosters i stap namba wan ples husat bai pilai wantaim namba 4 ples long lata, Melbourne Storm, long Fraide nait.

# Illawarra bai go insait long NRL fainal



**St GEORGE Illawarra i bin win wantaim laki skoa 32-30 na em bai go insait long fainal taim ol i bin daunim ol Wests Tigers long Olimpik pilai graun long Sydney, Australia.**

Ol Tigers i stap pas long

namba wan hap bilong pilai, tasol ol i rausim namba wan fowod bilong ol, Robbie Farah. Em i bin mekim wangepa asua na Illawarra i bin kwiktai skruim skoa bilong em na i win wantaim tupela poin.

Dispela win i rausim ol

Tigers long top 8 resis na Dragons i bin kisim namba 8 ples long top 8 lata.

Dragons bai pilai wantaim ol Sea Eagles long Sarere apinun na sapos ol i win em ol bai strongim top 8 ples bilong ol.

# Peni em i nupela sprinta long PNG

## MIRIAM Peni em i nupela sprinta long Papua Niugini.

Peni i gat 16 krismas na ol i bin painim em long 2014. Insait long 18 mun, em i bin soim tru kala bilong em.

Em i save stap wantaim famili bilong em long Ipswich long Kwinslan, Australia.

Papa bilong em, Jack Peni, i bilong Nangananga viles na mama bilong em i bilong Vunamami viles long Kokopo, Is Nu Britan.

Mama bilong em, Nola Peni, i bin holim Nesanel Junia Rekot bilong Long Jamp long mak bilong 5.51 mita long Nesanel sempionsip long Lae long yia 1992.

Bubu bilong em, Robert Bola, i makim PNG na pilai long Long na Tripel Jamp long namba wan Saut Pasifik Gems i kamap long Fiji long yia 1963.

Famili bilong Miriam i save pilai gut long etletiks na nau Miriam bai kam namba wan

rana bilong PNG.

Miriam i gat planti talen we em i save pilai Ragbi Tas tu tasol nau em i kamap etletik pilaia na PNG bai kisim biknem long gutpela disisen em bai mekim.

Kosa bilong em long Kwinslan, Vic Pascoe, i tok, "Miriam i abrusim sampela gutpela mak i kam antap long olgeta taim.

Miriam i bin winim 16 krismas klostu long 2015 Pasifik Gem i kamap long Pot Mosbi. Em i bin mekim disisen bilong em long yia 2013 olsem em bai kamap wanpela spot meri. Nau dispela disisen bilong em i karim kaikai we em i bin mekim gut insait long liklik taim.

Miriam i pilai aninit long Tim PNG long Osenia Sempionsip long Kens, Australia, long 8 Me i go inap long 10 Me.

Long 2015 Pasifik Gems long Pot Mosbi, em i go long

fainal aninit long wanman 100 mita resis long PNG 4\*100m rilei na em i bin winim wanpela silva medol.

Yia 2015 em i wanpela bisi taim bilong Miriam we em i stap long yia 10 na i gat fainal tes bilong em long mekim na long narapela sait em i bisi long etletiks.

Tasol, em i no kisim planti tingting bikos em i gat plant lain long sapotim em long go het long skul bilong em na spot wantaim.

Miriam bai makim PNG long etletiks na bai go long Samoa long Septemba 4 long Komonwelt Yut Gems.



Miriam Peni i stap long training. Piksa: Vic Pascoe

## Gurias i win

David Silovo, husat i go pas long lo bilong DC resis i tok, "Dispela kain pasin bilong ol sapota i no gutpela long ai bilong ol referi na lainsman husat i kam long narapela kantri."

"Referi i bin go bek long ples bilong em, tasol sekyuriti bilong pilai graun na

## i kam long bek pes

ol polis i aipas long dispela kain nogut pasin i bin kamap we ol i no tingim laip bilong referi na lainsman."

Minista bilong Spot, Justin Tkatchenko, i no pilim amamas long pasin bilong ol sapota bilong ol Lions na em i stopim tim TNA Simbu Lions na ol bai no inap long pilai moa insait long DC resis.

Minista i tok, "Referi em i no long Simbu, Rabaul, Morobe o PNG we ol i bin kirap na tromoi ol stik na kontena long em. Repri i kam long narapela kantri na dispela kain pasin bilong liklik lain Simbu i bagarapim nem bilong kantri."

"Mi rausim tim Simbu long DC resis we ol bai no inap long pila moa long ol yia i kam," Tkatchenko i tok.

# Minista i wari long Fiji i winim bid PNG Swiming bai ranim Swim Kosing Klinik

MINISTA bilong Spot, Justin Tkatchenko, i tokaut long wari bilong em long Fiji i winim resis long hostim 2016 Osenia Swiming Tonamen.

Ol i givim olgeta wok redi bilong kamapim swiming sempionsip resis bai kamap long 19-26 Jun, i go long Fiji taim em i daunim PNG long resis.

Fiji i stat long redim olgeta hap pilai nau.

Olgeta pipel husat i stap long bung bilong Osenia Swiming Asosiesen (OSA) long Kazan, Rasia, long taim bilong FINA wol Swiming

Sempionsip i votim Fiji long kamapim dispel bikpela resis.

Minista Tkatchenko i tok ol i bin mekim wantok sistem na ol i no makim long stret-pela rot. I gat bikepla askim i stap long eksen we ol i mekim long taim bilong bid na givim long Fiji.

Mista Tkatchenko i raitim pas i go long Vais Presiden bilong OSA, Dennis Miller, na i askim, "Long wanem as yupela i bid insait long 11 aua na givim tok orait long Fiji long kamapim dispela resis taim gavman bilong Fiji

i no givim sapot."

Tkatchenko i laik save long OSA mekim disisen em i strong olsem baset bilong Fiji i orait long givim mani long gem bai kamap na ol kontrak na ol narapela developmen bilong gem feseliti bai pinis insait long 10-pela mun.

Minista i askim tu olsem, long lo bilong FINA i save laikim ol long kondaktim vot long lukluk long risal namel long tupela kantri husat i resis long bid.

"Histori i soim olsem kantri husat i winim Pasifik Gem em

i stap long gutpela ples long hostim Osenia tonamen long wankain yia," Tkatchenko i tok.

Miller i tok, "Fiji i save hostim gem taim gavman bilong Fiji i save givim sapot long hostim gem."

Sapos gavman i givim sapot long hostim Osenia tonamen na i givim mani mak long kamapim dispela gem bai orait, tasol gavman i no mekim olsem.

OSA i gat pawa long givim 2016 OSC i go long ol narapela kantri husat i stap long resis bilong bid.

## PNG Swiming bai ranim Swim Kosing Klinik

PAPUA Niugini Swiming Inc. bai ranim FINA Swim Kosing Klinik long Taurama Akwatik Senta (TAC) long Pot Mosbi.

Dispela program bai kamap insait long 5-pela de we ol bai stat long Tunde 20 i go inap long Sarere 24 Oktoba, 2015.

I gat 35 manmeri bai kisim dispela kos aninit long kos ol i kolim 'tisa ov swiming kosing klinik', em i save helpim long developim teknik o ol stail bilong swim.

Ol bai lainim ol teknik bilong swim long moning na long apinun ol bai mekim prektikal long olgeta divisen bilong swim.

Save man we ol i kisim i kam long karimaut dispela trening em John Baldonwho, husat i hetman bilong Akwatik long Knox Grama Skul long Sydney, Australia.

John em i Silva Lasins

kosa wantaim digri em i bin kisim long spot saiens long Nu Saut Wels Yunivesiti.

John i stap memba na het kosa long NSW na Australia Age na Yut Tim insait long 15 yia na nau em i kosa bilong Stet Tim long yia 2013 na i kam antap long 2015.

PNGSI i tok tenkyu na tok orait long John bai kam na givim gutpela save na skul long ol yangpela PNG swima.

John em i wanpela namba wan swima long kantri bilong em long Ingran na em i bin statim wok bilong em olsem em i kamap swiming tisa insait long 30 yia i go pinis.

Em i gat tupela pikinini husat i winim 13 na 16 krismas pinis, na tupela wantaim i namba wan swima.

PNGSI i laikim ol manmeri husat i gat amamas long kamap stap wantaim long taim bilong trening em ol i ken kam

## Spot i kamapim developmen

### Philemon Tame i raitim

OL wok aninit long spot i ken kamapim developmen insait long Pasifik Rijen.

Papua Niugini Spot Fed-eresen na Olimpik Komiti (PNGOC) i bin bung long las wik Sande na tokim ol Pasifik nius ripota long Pot Mosbi olsem spot i wanpela rot bi-

long developim sosaiti.

Presiden bilong PNGOC, Sir John Dawanincura, i tokim ol lokal na intanesenel nius ripota olsem, "Spot i save mekim wok insait long komyuniti long kirapim tingting bilong stap wantaim bel isi long wanpela komyuniti, wanpela pasin na wantaim gutpela helt."

"Mipela i pinisim gut 2015 Pasifik Gem i soim olsem planti wok developmen i kamap. Na dispela ol developmen em i no long sait bilong wokim rot, bris na haus tasol, nogat. Em i ken kirapim tingting bilong ol man long kisim save na ol narapela gutpela samting long painim gutpela sindaun," Sir

John i tok.

Ol pilai long 2015 Pasifik Gem i kamap orait na em i bin kirapim tingting bilong ol yangpela long ol i ken bihainim na pilai.

"Infomol sekta tu i gat sans long salim ol prodak na kisim mani na dispela i soim olsem spot em i tul bilong developmen," Sir John i tok.

**Travel to Kiungu**  
Visit friends and family.  
When were you home last?



**Linking our country**

Reservations - Toll Free: 1805465 Email: sales.linkpng@airniugini.com.pg  
Find us on Facebook: www.facebook.com/linkpng





**Amamas long win:** Agmark Rabaul Gurias i amamas long winim tropi bilong Digicel Kap. Dispela em namba 6 win bilong ol.



**TAKOL YA:** Pilaia bilong Wigmen wantaim bal i laik go daun long trai lain tasol pilaia bilong Snex Tigers i takolim em long pilai ov bilong namba tri namba foa ples long Digicel Kap long Mosbi.



**OL LIONS SINGAUT:** Ol sapota bilong TNA Simbu Lions i amamas long wanpela trai bilong Lions.



**AI SORE:** Bikpela fowod bilong Rabaul Gurias i traim banis bilong Simbu Lions long gren fainal pilai bilong ol. Gurias i win 26-18.




**LUSIM MI:** Chris Jerry bilong Agmark Gurias i traim long sait step long pilaia bilong TNA Lions. Jerry em pilai meka bilong Gurias long win bilong ol.

*Ol poto: Nicky Bernard.*



**Simbu Lions:** TNA Simbu Lions wantaim medol bilong ol. Bihain long longpela taim ol i no stap long dispela resis ol kam namba tu.



**IMPROVED TASTE!** Niupela teist wantaim planti mit na oil. Teistim na bai yu laikim moa yet.

# DIANA

Tuna



Emi tuna  
bilong PNG



Manufactured by



RD Tuna Canners Ltd.

Moa mit na  
oil insait



TUNA IN OIL

# Gurias i win

## Simbu bai no inap pilai moa long DC

### Philemon Tame i raitim

RABAUL Agmark Gurias i kamap sempion bilong Digicel Kap (DC) resis bilong 2015 we skoa i sanap olsem 26-18 na ol TNA Simbu Lions i bin kraik long pilai graun.

Dispela em i no namba wan taim we ol Rabaul i bin go long gren fainal, nogat. Ol i save i go long ol fainal long olgeta taim resis bilong Digicel Kap i save kamap.

Tasol, ol Simbu Lions i makim namba tu taim long pilai long gren fainal.

Namba wan taim we ol Lions i bin go long gren fainal em long yia 1996 long Lae.

Ol Lions i bin kamapim tim bilong ol olsem Simbu Warriors long dispela taim we ol i bin go long gren fainal long 1996.

Long wankain taim ol i bin lus long gren fainal na ol sapota na tim memba bilong Simbu i kirapim birua pasin na ol tim opisal i bin rausim ol long pilai inap long 10-pela yia.

Dispela wankain pasin i bin kamap long Sir John Guise pilai graun long las wik Sarere taim ol Gurias i win.

Ol sapota i bin kirap na tromoi ol kontena na ol narapela rabis i go long referi na tupela lainsman bihain long pilai i pinis.

...lukim moa long pes 26



Poto: Nicky Bernard

**BOROKO MOTORS**

**PMV**

DIESEL OIL

**PMV OIL  
BILONG YUMI**

**BOROKO MOTORS**

PORT MORESBY	☎	325 5255
LAE	☎	472 1144
MT HAGEN	☎	542 1933
TABUBIL	☎	649 9048
KIMBE	☎	983 5035
MADANG	☎	422 2859
KOKOPO	☎	982 8183
GOROKA	☎	532 3552

Email: info@borokomotors.com.pg  
Website: www.borokomotors.com.pg